

四庫全書

經部

欽定四庫全書

經部

春秋纂言卷十二

詳校官鴻臚寺少卿臣蔡景陽

給事中臣溫常綬覆勘

總校官進士臣繆琪

校對官中書臣王璣

謄錄監生臣李永寧

欽定四庫全書

春秋纂言卷十一

元 吳澄 撰

定公

名宋襄公庶子昭公弟也左傳及史記不見其母之姓氏在位十五年

元年

壬辰敬王十一年。晉霸定三年。蔡昭十年。曹隱公通元年。衛靈公二十六年。鄭獻五

年。陳惠二十一年。杞悼九年。宋景八年。

齊景三十九年。秦哀二十八年。楚昭七年。

吳閻廬六年。薛氏曰昭公已卒定公未踐

祚是昭公之末世未得為定公之始年也

春

公羊傳曰定無正月者即位後也沙隨程氏曰定公未立先書元年春者追書之也劉氏曰定無正

月微辭也張氏曰昭公自去年十二月薨於乾侯魯國之政聽命疆臣不書正月見一國之無主而

正朔之無所承也澄曰凡人君初年雖無事必書正月者蓋於是日行即位禮也隱公雖不行即位禮而書正月者亦於是日見羣臣也唯定公不書正月蓋昭公薨於外定公未立魯國無君正月朔日羣臣無朝正之禮而此月又無它國之事故書王二月亦無事至三月始有執宋仲幾之事故書王月也

王三月

晉人執宋仲幾于京師

左傳曰晉魏舒合諸侯之大夫城成周屬役於韓簡

子宋仲幾不受功曰滕薛鄆吾役也薛宰曰宋為無道絕我小國於周以我適楚故我常從宋晉文公為踐土之盟曰各復舊職若從踐土若從宋亦唯命仲幾曰踐土固然薛宰曰薛之皇祖奚仲居

薛以為夏車正奚仲遷於邳仲虺居薛以為湯左
相若復舊職將承王官何故以役諸侯仲幾曰三
代各異物薛焉得有舊為宋役亦其職也士彌牟
曰晉之從政者新子姑受功歸吾視諸故府仲幾
曰縱子忘之山川鬼神其忘諸乎士伯怒謂韓簡
子曰薛徵於人宋徵於鬼宋罪大矣且已無辭而
抑我以神誣我也啟寵納侮其此之謂也必以仲
幾為戮乃執仲幾以歸城三旬而畢乃歸諸侯之
戎穀梁傳曰不正其執人於尊者之所也澄曰上
年之冬晉率魯齊宋衛鄭曹莒薛杞小邾十國之
臣城成周仲氏幾名宋三命之卿來會城役左氏
以為宋仲幾不受功故今年三月晉以霸主之令
執之京師即成周也其時王居成周故以成周為
京師左氏有歸於京師四字據經所書但見其執
於京師不見其歸於京師也孫氏曰宋仲幾會城
成周韓不信陪臣也非天子命執仲幾於天子之

側甚矣胡氏曰周官凡卿大夫之獄訟斷以邦法則大司寇之職也不告於司寇而執人於天子之側故雖以王事討有罪猶貶

夏

六月

癸亥公之喪至自乾侯

左傳曰叔孫成子逆公之喪于乾侯季孫曰子家子

亟言於我未嘗不中吾志也吾欲與之從政子必止之且聽命焉子家子不見叔孫易幾而哭叔孫請見子家子子家子辭曰羈未得見而從君以出君不命而薨羈不敢見叔孫使告之曰公行公為實使羣臣不得事君若公子宋主社稷則羣臣之願也凡從君出而可以入者將唯子是聽子家氏

未有後季孫願與子從政此皆季孫之願也使不敢以告對曰若立君則有卿士大夫與守龜在羈弗敢知若從君者則貌而出者入可也冠而出者行可也若羈也則君知其出也而未知其入也羈將逃也喪及壞
殯從公者皆反

戊辰公即位

公羊傳曰蜀為戊辰之日然後即位穀梁傳曰殯然後即位也陸氏曰凡

公即位皆於朔日故不書朔定公待昭公喪至既殯而即位故書之劉氏曰昭公薨於乾侯季孫廢太子衍及務人而立昭公之弟公子宋蓋受之於季氏也高氏曰季氏既逐其君君薨又不即以國君喪禮迎之今又廢其適嗣而專立其弟宋不擇所處汚於偽誘於利昭公喪至五日而殯遂自即位此非受之先君而專受之意如者也既為意如所立故不復討意如之罪

秋

七月

癸巳葬我君昭公

左傳曰季孫使役如闕公氏將溝焉榮駕鸞曰生不能事死又

離之以自旌也縱子忍之後必或恥之乃止葬昭公於墓道南孔子之為司寇也溝而合諸墓杜氏曰公在外薨八月乃葬高氏曰昭公薨於外凡半歲餘始以喪歸歸及周月而遽葬見魯之臣子無

恩於先君如此

九月

大雩

立煬宮

煬羊讓切。○左傳曰：昭公出季平子禱於煬宮。高氏曰：昔季孫行父嘗立武宮矣。煬

公伯禽之子比武公尤遠，廟毀久矣，意如之逐君也，懼而禱焉。昭公薨於外，因以為應，遂為之立宮。張氏曰：季氏妄禱而踰祀典，以立久祧之宮，聖人特書，必有會，謂煬宮不如林放之嘆乎。

冬

十月

隕霜殺菽

穀梁傳曰：未可以殺而殺，舉重可殺而不殺，舉輕其曰菽，舉重也。杜氏曰：周十

月今八月，隕霜殺菽，非常之災。蘇氏曰：於其不殺而言草，言其廣也；於其殺而言菽，言其所害也。高氏曰：菽，草之難殺者也；言殺菽則知草皆死矣。言不殺草則知菽亦不死也。

經書月五書日三大衍歷正月乙亥小丁酉冬至
二月甲辰大三月甲戌大四月甲辰小五月癸酉
大六月癸卯小癸亥二十一日戊辰二十六日七
月壬申大癸巳二十二日八月壬寅小閏月辛未
大九月辛丑小十月庚午大十
一月庚子小十二月己巳大

二年

癸巳敬王十二年○晉霸定四○蔡昭十一○
曹隱二○衛靈二十七○鄭獻六○陳惠二十
二○杞悼十○宋景九○齊景四十○
秦哀二十九○楚昭八○吳閻廬七

春

王正月

夏

五月

壬辰雉門及兩觀災

杜氏曰雉門公宮之南門兩觀闕也孔疏曰闕在門兩旁

中央缺然為道也其上縣法象其狀巍然為大謂之象魏使人觀之謂之觀兩觀也象魏也闕也一物而三名也兩觀在雉門之兩旁孫氏曰雉門兩觀天子之制雉門與兩觀俱災也杜氏謂曰魯以周公之故立雉門兩觀僭天子也魯之僭禮聖人譏之必因其事而托義焉此雉門兩觀其僭久矣若不災則不可得而錄之今災及而書實譏其僭也

秋

楚人伐吳

左傳曰桐叛楚吳子使舒鳩氏誘楚人曰以師臨我我伐桐為我使之無忌楚

囊瓦伐吳師於豫章吳人見舟於豫章而潛師於巢吳軍楚師於豫章敗之遂圍巢克之獲楚公子繁襄陵許氏曰自襄三年書楚伐吳七書楚伐僅能一克於朱方它役皆敗無功積其陵暴首兵之咎將至於禍敗失國也

冬

十月

新作雉門及兩觀

穀梁傳曰言新有舊也作為也有加其度也劉氏曰魯用王禮

其庫門天子臯門雉門天子應門而設兩觀僭君甚矣習舊而不知以為非高氏曰莊二十有九年新延廡不言作言作者改舊制而增大之也魯僭天子之禮天亦變以警之遇災而不知以為戒乃

更作而新之反加其度焉是魯之僭
終無已也特書新作罪在定公也

經書月三書日一大衍歷正月己亥小壬寅冬至
二月戊辰大三月戊戌小四月丁卯大經五月壬
辰在此月五月丁酉小六月丙寅大七月丙申大
八月丙寅小九月乙未大十月乙丑小十一月甲
午大十二月甲子小長歷是年
閏五月壬辰五月二十六日

三年

甲午敬王十三年○晉霸定五○蔡昭十二○
曹隱三○衛靈二十八○鄭獻七○陳惠二十
三○杞悼十一○宋景十○齊景四十
一○秦哀三十○楚昭九○吳闔廬八

春

王正月

公如晉至河乃復

程子曰季孫意如上不請於天子下不告於方伯而立定公故

晉怒而公往朝焉晉辭公而復故明年因會而請盟於臯鼫

二月

辛卯邾子穿卒

莊公也在位三十三年子益嗣

夏

四月

秋

葬邾莊公

七月而葬緩

冬

仲孫何忌及邾子盟于拔

拔公作枝。○左傳曰：修邾好也。襄陵許氏曰：公

至河乃復晉之輕魯也。仲孫何忌及邾子盟魯之輕邾也。當昭公時，侵祥猶未爾也。高氏曰：邾子居

喪而以吉禮與魯大

夫盟其微弱可知

經書月三書日一大衍歷正月癸巳大戊申冬至

二月癸亥小辛卯二十九日三月壬辰大四月壬

戌小五月辛卯大六月辛酉小七月庚寅大八月

庚申小九月己丑大十月己未小十一月戊子大

十二月

戊午大

四年

乙未敬王十四年。○晉霸定六。○蔡昭十三。○曹隱四。○衛靈二十九。○鄭獻八。○陳惠二十

四卒。杞悼十二卒。宋景十一。齊景四十二。秦哀三十一。楚昭十。吳闔廬九

春

王二月

癸巳陳侯吳卒

惠公也在位二十四年子柳立是為懷公

三月

公會劉子晉侯宋公蔡侯衛侯陳子鄭伯許男曹

伯莒子邾子頓子胡子滕子薛伯杞伯小邾子齊

國夏于召陵侵楚

左傳曰蔡昭侯為兩佩與兩裘以如楚獻一佩一裘於昭王昭

王服之以享蔡侯蔡侯亦服其一子常欲之弗與
三年止之唐成公如楚有兩肅與馬子常欲之弗
與亦三年止之唐人或相與謀請代先從者許之
飲先從者酒醉之竊馬而獻之子常子常歸唐侯
自拘於司敗曰君以弄馬之故隱君身奔國家羣
臣請相夫人以償馬必如之唐侯曰寡人之過也
二子子無辱皆賞之蔡人聞之固請而獻佩於子
常子常朝見蔡侯之徒命有司曰蔡君之久也官
不共也明日禮不畢將死蔡侯歸及漢執玉而沈
曰余所有濟漢而南者有若大川蔡侯如晉以其
子元與其大夫之子為質焉而請伐楚三月劉文
公合諸侯於召陵謀伐楚也晉荀寅求貨於蔡侯
弗得言於范獻子曰國家方危諸侯方貳將以襲
敵不亦難乎水潦方降疾瘡方起中山不服弃盟
取怨無損於楚而失中山不如辭蔡侯吾自方城
以來楚未可以得志祇取勤焉乃辭蔡侯晉人假

羽旄於鄭鄭人與之明日或旆以會晉於是失諸
侯程子曰楚恃其彊侵陵諸侯晉上請於天子大
合諸侯以伐之而不能明暴其罪以行天討無功
而還故書侵高氏曰入春秋來蔡人首叛中國而
附楚至是蔡人不勝楚之陵虐乃使告於諸侯有
能伐楚者蔡願為之先鋒晉侯於是合諸侯于召
陵以救蔡伐楚也書會于召陵侵楚者以見諸侯
不振卒使救蔡伐楚之功歸於吳晉為盟主大合
諸侯十八國之衆天子使大夫臨之可謂盛矣乃
不能成伐楚之功而吳以一國之師敗之召陵近
蔡地是時晉荀寅求貨於蔡蔡人弗與遂辭不進
晉是以失諸侯中國遂大亂吳子主黃池之會自
此始也

夏

四月

庚辰蔡公孫姓帥師滅沈以沈子嘉歸殺之

姓公作歸

姓。左傳曰：沈人不曾於召陵，晉人使蔡伐之，滅沈。胡氏曰：所惡於前，無以先後出乎爾者，反乎爾者也。蔡侯視楚猶沈，視蔡也。昭公拘於郢三年而後反，非以國小而弱乎？沈雖不會召陵，未有大罪惡也。而恃彊殺之，甚矣！能無公孫翩之及哉？呂氏曰：蔡公孫姓不能正其君之失，而遂滅沈，至以沈子嘉歸殺之，其罪極矣。高氏曰：沈不與於召陵者，與楚故也。與楚者，不受晉令也。故晉因使蔡逞其忿焉。夫蔡屢為楚所滅，今而舍楚，不易矣。晉侯不能恢弘霸業，求所以服楚而保蔡，從蔡侵楚，固已失之一沈，不能容而殺之，歸惡於蔡，是重楚人怒蔡而易晉爾。蔡雖齊桓之世，不深即中國，非不即

中國也國近楚有畏焉不能保其無它也昭公穀
然奔之蔡計則失蔡意則可嘉乃復為此舉嗚呼
使昭公而知保國必悔之

五月

公及諸侯盟于臯鼬

鼬由又切公作浩油。左傳曰及臯鼬將長蔡於衛衛侯

使祝佗私於襄弘弘悅告劉子與范獻子謀之乃
長衛侯於盟張氏曰臯鼬許地杜氏曰繁陽縣東
南有城臯亭高氏曰此召陵之諸侯也襄二十
五年重丘之盟亦會盟異處而不言公及何也程子
曰公以不獲見於晉故因會而求盟焉則此盟公
意也故書公及陸氏曰重言諸侯劉子不與盟也

杞伯成卒于會

成公作戌。不言卒於師者以不
成伐楚也杞悼公在位十二年世

子乞嗣是為隱公七月其弟
過殺隱公而自立是為僖公

六月

葬陳惠公

高氏曰此見陳侯背殯出會也蓋君有殯則辭會可也雖不得已於晉今而齊

亦使國
夏來爾

許遷于容城

容城也關任公輔以為華容縣亦祈之近地也高氏曰自葉遷也至是蓋

矣
四遷

秋

七月

公至自會

襄陵許氏曰不至侵楚譏無功也高氏曰晉以伐楚召諸侯而以會至者不成

乎伐也

劉卷卒

卷音權。趙氏曰畿內諸侯不同列國澄曰王朝大夫雖食邑於劉其爵為子然不

同於列國諸侯故卒不稱爵而但稱名若畿外諸侯則稱爵稱名也

葬杞悼公

魯往會也

楚人圍蔡

左傳曰楚為沈故圍蔡

晉士鞅衛孔圉帥師伐鮮虞

襄陵許氏曰謀楚而不能討盟蔡而不能

救一唯中山是代書卿與師著威勝不行於彊暴而行於寡弱也

葬劉文公

趙氏曰劉文公天子畿內諸侯列國不當與行交往之禮今會其葬非禮也高

氏曰尹氏王子虎皆不書葬此書葬者以魯特往會之也

冬

十有一月

庚午蔡侯以吳子及楚人戰于柘舉楚師敗績柘

舉

公作伯莒。左傳曰伍員為吳行人以謀楚楚之殺卻宛也伯氏之族出伯州犂之孫詬為吳太宰以謀楚楚自昭王即位無歲不有吳師蔡侯因之以其子乾與其大夫之子為質於吳蔡侯吳子唐侯伐楚舍舟於淮汭自豫章與楚夾漢左司馬戍謂子常曰子沿漢而與之上下我悉方城外以毀

其舟還塞大隧直轅冥阮子濟漢而伐之我自後
擊之必大敗之既謀而行武城黑謂子常曰吳用
木也我用革也不可久也不如速戰史皇謂子常
楚人惡子而好司馬若司馬毀吳舟於淮塞城口
而入是獨克吳也子必速戰不然不免乃濟漢而
陳自小別至於大別三戰子常知不可欲奔史皇
曰安求其事難而逃之將何所入子必死之初罪
必盡說二師陳於伯舉闔廬之弟夫槩王晨請於
闔廬曰楚无仁其臣莫有死志先伐之其卒必
奔而後大師繼之必克弗許夫槩王曰所謂臣義
而行不待命者其此之謂也今日我死楚可入也
以其屬五千先擊子常之卒子常之卒奔楚師亂
吳師大敗之公羊傳曰蔡昭公朝乎楚有美裘焉
囊瓦求之昭公不與為是拘昭公於南郢數年然
後歸之於其歸焉用事乎河曰天下諸侯苟有能
伐楚者寡人請為之前列楚人聞之怒為是興師

使囊瓦將而伐蔡蔡請救於吳伍子胥復曰蔡非有罪也楚人為無道君如有憂中國之心則若時可矣於是興師而救蔡孫氏曰以者乞師而用之也楚人圍蔡晉師不出故蔡侯去晉求救於吳晉合十八國不能救蔡伐楚吳能救之伐之自是諸侯小大皆宗於吳杜氏曰栢舉楚地

楚囊瓦出奔鄭

高氏曰此栢舉之敗將也胡氏曰囊瓦貪以敗國又不能死可賤甚矣

庚辰吳入楚

楚左作郢○左傳曰吳從楚師五戰及郢楚子取其妹季芊畀我以出吳

入郢以班處宮子山處令尹之宮夫槩王欲攻之懼而去之夫槩王入之楚子涉睢濟江入於雲中盜攻之王奔郢郢公辛與其弟巢以王奔隨初伍員與申包胥友其亡也謂申包胥曰我必復楚國

申包胥曰勉之子能復之我必能興之及昭王在
隨申包胥如秦乞師曰吳為封豕長蛇以薦食上
國虐始於楚寡君失守社稷越在草莽使下臣告
急曰夷德無厭若鄰於君疆場之患也逮吳之未
定君其取分焉若楚之遂亡君之土也若以君靈
撫之世以事君秦伯使辭焉曰寡人聞命矣子姑
就館將圖而告對曰寡君越在草莽未獲所伏下
臣何敢即安立依於庭牆而哭日夜不絕聲勺飲
不入口七日秦哀公為之賦無衣九頓首而坐秦
師乃出秦子蒲子虎帥車五百乘以救楚子蒲曰
吾未知吳道使楚人先與吳人戰而自援會之大
敗夫繁王於沂吳人獲遂射於栢舉其子帥奔徒
以從子西敗吳師於軍祥子期子蒲滅唐吳師敗
楚師於雍澁秦師又敗吳師吳師居麋子期焚之
而又戰吳師敗又戰於公婿之谿吳師大敗吳子
乃歸孫氏曰吳子救蔡伐楚善也乘囊瓦之敗長

驅入郢夷其宗廟
壞其宮室則甚矣

經書月七書日四大衍歷正月戊子小癸巳六日
癸丑冬至二月丁巳大三月丁亥小四月丙辰大
庚辰二十五日閏月丙戌小五月乙卯大六月乙
酉小七月甲寅大八月甲申小九月癸丑大十月
癸未小十一月壬子大庚午十九日庚辰二
十九日十二月壬午小長歷是年閏七月

五年

丙申敬王十五年。晉霸定七。蔡昭十四。
曹靖公露元年。衛靈三十。鄭獻九。陳懷公

柳元年。杞僖公過元年。宋景十二年。齊景
四十三。秦哀三十二。楚昭十一。吳閔廬十

春

王三月

三月公
作正月

辛亥朔日有食之

夏

歸粟于蔡

杜氏曰蔡為楚所圍飢乏故魯歸之粟呂氏曰列國飢諸侯歸粟以先王之澤

猶有存者也

於越入吳

左傳曰吳在楚也杜氏曰於發聲也劉氏曰於越者其自稱者也越者中國稱

之者也高郵孫氏曰越見於經凡六其三稱越皆在昭公之時五年越人與楚人伐吳七年楚放公子昭於越三十二年吳伐越皆曰越也其三稱於越二在定公之時五年於越入吳十四年於越敗吳於檇李一在哀公之時十三年於越入吳皆曰於越也高氏曰闔廬爭入郢之利而於越入吳夫

差取盟晉之功而於越入吳意有所逐而愛有所
忘矣按昭五年楚子以諸侯伐吳而越人已見於
經至此及十四年至哀十三年皆書於越越人自
名曰於越君子名之曰越吳之伐楚有安中國之
意焉越乃乘其士卒罷獎掩入其國至十四年又
敗吳於槜李哀十三年又入吳若為楚復讎者是
以君子惡之於越與漢書於越同義蓋於于越
粵皆發語辭經書於餘丘亦即其自稱書之也

六月

丙申季孫意如卒

左傳曰季平子卒陽虎將以璜
瑤飲仲梁懷弗與曰改步改玉

陽虎欲逐之告公山不狃不狃曰彼為君也子何
怨焉既葬桓子行東野及費子洩為費宰逆勞於
郊桓子敬之勞仲梁懷仲梁懷弗敬子洩怒謂陽
虎子行之乎陽虎因季桓子及公父文伯而逐仲

梁懷殺公何藐盟桓子於稷門之內大誼遂公父
歎及秦邁皆奔齊澄按平子意如季孫宿之孫悼
子紇之子也子
斯嗣是為桓子

秋

七月

士子叔孫不敢卒

此成子不敢叔孫嫗之子無見
於經而卒之者著叔孫之有後

也子州仇嗣
是為武叔

冬

晉士鞅帥師圍鮮虞

左傳曰報觀虎之役也杜氏
曰三年鮮虞獲晉觀虎高氏

曰以四年之伐未得志故也兵益憤義益不勝也

經書月三書日三大行歷正月辛亥大戊午冬至
二月辛巳大三月辛亥小朔日食黃道室四度半
彊四月庚辰大五月庚戌小六月己卯大兩申十
八日七月己酉小壬子四日八月戊寅大九月戊
申小十月丁丑大十一月
丁未小十二月丙子大

六年

丁酉敬王十六年。晉霸定八。蔡昭十五。
曹靖二。衛靈三十一。鄭獻十。陳懷二。
杞僖二。宋景十三。齊景四十四。秦
哀三十三。楚昭十二。吳閻廬十一。

春

王正月

癸亥鄭游速帥師滅許以許男斯歸

左傳曰因楚敗也高氏曰

鄭許之怨舊矣許本恃楚以固其國至於四遷而楚不能為之疆而鄭游速以偏師一出滅其國而俘其君豈是楚人累敗於吳故鄭因乘許之微弱而肆其暴邪張氏曰按許自隱十一年齊魯鄭之入至今年大抵因於與鄭為鄰至成十五年遷葉之後又畏鄭而遷也定四年方自析遷容城以依楚不數年楚困於吳鄭遂滅之然自哀元年以後許復見之者楚又存之也大岳之後其亡一見害於鄭其存一恃於楚不過百年韓遂滅鄭亦有由也

二月

公侵鄭

左傳曰周儋翩率王子朝之徒因鄭人將以作亂於周鄭於是乎伐馮滑胥靡負黍

狐人闕外公侵鄭取匡為晉討鄭之伐胥靡也高
氏曰召陵之盟口血未乾而鄭保囊瓦滅許故晉
命公興師而討之是時季孫斯初嗣卿位陪臣
陽虎執國命又迫於晉命進退皆不由公也

公至自侵鄭高氏曰公內有彊臣不能討乃為晉討鄭內外結怨危之道也

夏

季孫斯仲孫何忌如晉

左傳曰季桓子如晉獻鄭俘也陽虎彊使孟懿子往

報夫人之幣晉人無享之孟孫立於房外謂范獻子曰陽虎若不能居魯而息肩於晉所不以為中軍司馬者有如先君獻子曰寡君有官將使其人執何知馬獻子謂簡子曰魯人患陽虎矣孟孫知其囂以為必適晉故彊為之請以取入馬高氏曰一卿將命尚無它事豈可每事一卿乎故累數之

見二卿為陽虎所制也夫以二子之力專國擅君而陽虎乃能制之進云則進止云則止猶僕隸也嗚呼天子微諸侯借諸侯微大夫凌大夫微陪臣脅理勢然爾襄陵許氏曰魯國政在大夫而家臣能彊使之則家臣始擅國矣

秋

晉人執宋行人樂祁犂

左傳曰宋樂祁言於景公曰諸侯唯我事晉今使不

往晉其憾矣樂祁告其宰陳寅陳寅曰必使子往它日公謂樂祁曰唯寡人說子之言子必往陳寅曰子立後而行吾室亦不忘唯君亦以我為知難而行也見酒而行趙簡子逆而飲之酒於錦上獻楊楸六十於簡子陳寅曰昔吾主范氏今子主趙氏又有納焉以楊楸賈禍弗可為也已然子死晉

國子孫必得志於宋范獻子言於晉侯曰以君命越疆而使未致使而私飲酒不敬二君不可以不討也乃執樂祁張氏曰諸侯唯宋事晉懼討而遣使善逆以懷之猶懼不來而大夫黷貨賄爭權利卒使來者見執叛者得志晉之亂政亟行霸統所由絕也胡氏曰使范趙方睦皆有獻焉則弗執之矣執異國行人出於列卿私意威柄不復在其君矣

冬

城中城

穀梁傳曰三家張也高氏曰三家張公之所有中城而已成九年城之矣此復城者

外有齊鄭之怨故懼而城焉杜氏曰公為晉侵鄭故懼而城之

季孫斯仲孫忌帥師圍鄆

忌上脫何字。杜氏曰何忌不言何闕文呂氏

曰仲孫忌闕文無疑也而公羊以為譏二名三傳解經皆據文主義不論是非無復闕疑高氏曰鄆自昭二十五年齊侯取之以居昭公三十年鄆潰遂貳於齊至是二卿圖而欲復取之蓋陽虎欲傾季氏以謀政也季仲圖而曰陽虎何哉

哉虎專季氏季氏專魯仲何為哉

經書月二書日一大衍歷正月丙午小癸亥十八日冬至二月乙亥大三月乙巳小四月甲戌大五月甲辰小六月癸酉大七月癸卯大八月癸酉小九月壬寅大十月壬申小十一月辛丑大十二月辛未小

七年

戊戌敬王十七年。晉霸定九。蔡昭十六。曹靖三。衛靈三十二。鄭獻十一。陳懷三。

杞僖三。宋景十四。齊景四十五。秦哀三十四。楚昭十三。吳闔廬十二。

春

王正月

夏

四月

秋

齊侯鄭伯盟于鹹

左傳曰齊鄭盟于鹹徵會于衛襄陵許氏曰齊鄭之盟叛晉也

霸道隳諸侯散離盟始復自是中國無殷會矣杜氏曰鹹衛地永嘉陳氏曰此特相盟自齊桓以來未之有於是再見諸侯無主盟矣是故石門志諸侯之合也鹹志諸侯之判也

齊人執衛行人北宮結以侵衛

左傳曰衛侯欲叛晉諸大夫不可使

北宮結如齊而私於齊侯曰執結以侵我齊侯從之劉氏曰善為國者親近而遠信之附內而外歸之衛侯欺其羣臣以結晉殘其百姓以奉齊齊之執結也固非霸討矣而衛之無良又甚焉從此觀之孟子曰今之諸侯五霸之罪人也不亦信乎

齊侯衛侯盟于沙

沙下公有澤字。杜氏曰結叛晉也。澄謂執其行人以與其君

結盟以叛晉齊衛之罪均也杜氏曰陽平元城縣東南有沙亭張氏曰元城今屬大名府

大雩

齊國夏帥師伐我西鄙

左傳曰齊國夏伐我陽虎御季桓子公歛處父御孟

懿子將宵軍齊師齊師聞之墮伏而待之處父曰虎不圖禍而必死苦夷曰虎陷二子於難不待有司余必殺女虎懼乃還不敗蘇氏曰魯事晉而齊叛之故伐我高氏曰齊叛晉與鄭盟故為鄭伐我且報二卿之圖鄆襄陵許氏曰東夏諸侯唯魯事晉故齊伐之景公乘晉之衰不思唯德之務以懷諸侯而欲力征經營以定霸統是知時之或可而不知己之不可者也

九月

大雩

冬

十月

經書月四書日無大衍歷正月庚子大己巳冬至
閏月庚午小二月己亥大三月己巳四月戊戌
大五月戊辰小六月丁酉大七月丁卯小八月丙
申大九月丙寅小十月乙未大十一月乙丑大十
二月乙未小三統歷是年正月
己巳朔冬至殷歷正月庚午朔

八年

己亥敬王十八年。晉霸定十。蔡昭十七。
曹靖四卒。衛靈三十三。鄭獻十二。陳懷
四卒。杞僖四。宋景十五。齊景四十六。
秦哀三十五。楚昭十四。吳闔廬十三。

春

王正月

公侵齊

左傳曰門于陽州杜氏曰報前年代我西
鄙高氏曰去年齊代我西鄙有辭于我也

公如兵于齊則無名矣是魯政不復在公矣而三家者實使公欲歸怨於公故也

公至自侵齊

高氏曰侵齊本出於三家而三家欲歸怨於公故未逾月而至之且為下

復侵齊起也

二月

公侵齊

左傳曰攻廩丘之郭杜氏曰未得志故秦山孫氏曰公再侵齊以重其怨甚矣

三月

公至自侵齊

高氏曰公踰月之間再出侵齊雖三家者之為然頻往頻來不得休息見

公之進退益不自專矣故兩書侵至以見之

曹伯露卒

靖公也自曹悼公卒其弟聲公野立五年而其弟通弑聲公代立是為隱公隱

公立四年其弟露又弑隱公代立而經不書者曹亂故畧之也凡立四年其子陽嗣遂為宋所滅

夏

齊國夏帥師伐我西鄙

高氏曰以公不與鹹沙之盟且報此春之再侵也按

昭公之孫也齊雖不克納而有意存之矣定公即位未嘗修好於齊故齊比年伐我而我亦再侵齊觀春秋書齊伐公侵則其曲直可見矣襄陵許氏曰春秋書內伐十六宣以後七內侵七宣以後六伐我二十一宣以後十七侵我五宣以後一用兵則侵多而伐少被兵則伐多而侵少蓋魯自中世衰矣而欲與齊構怨以侵易伐其能久乎

公會晉師于瓦

左傳曰齊伐我晉士鞅趙鞅荀寅救我公會晉師高氏曰晉將來救

而齊師已退故公出而逆之于瓦不書救者齊師先自退不因晉救之至也杜氏曰瓦衛地東郡茌

縣東北有瓦亭張氏

曰今滑州白馬縣

公至自瓦

高氏曰不以會至者公非出會也

秋

七月

戊辰陳侯柳卒

懷公也在位四年子越立是為愍公

晉士鞅帥師侵鄭遂侵衛

士公作趙○左傳曰晉師將盟衛侯于鄆澤趙

簡子曰羣臣誰敢盟衛君者涉佗成何曰我能盟之衛人請執牛耳成何曰衛吾溫原也焉得視諸侯將歆涉佗按衛侯之手及挽衛侯怒王孫賈趨進曰盟以信禮也有如衛君其敢不唯禮是事而受此盟也衛侯欲叛晉而患諸大夫王孫賈使次于郊大夫問故公以晉詬語之且曰寡人辱社稷其改卜嗣寡人從焉大夫曰是衛之禍豈君之過也公曰又有患焉謂寡人必以而子厚與大夫之子為質大夫曰苟有益也公子則往羣臣之子敢不皆負羈紼以從將行王孫賈曰苟衛國有難工商未嘗不為患使皆行而後可公以告大夫乃皆將行之行有日公朝國人使賈問焉曰若衛叛晉晉五伐我病何如矣皆曰五伐我猶可以能戰賈曰然則如叛之病而後質焉何遲之有乃叛晉晉人請改盟弗許晉士鞅會成桓公侵鄭國彘宰報伊闕也遂侵衛高氏曰鄭伯與齊為鹹之盟衛侯

與齊為沙之盟二國皆以齊而叛晉晉以是侵鄭
侵衛所以絕齊之與國也晉不聲其罪不能取服
故兩書侵襄陵許氏曰招攜以禮懷遠以德鹹沙
之盟諸侯已貳晉不思德禮之是務而欲恃力攘
服則失霸
何日之有

葬曹靖公

九月

葬陳懷公

季孫斯仲孫何忌帥師侵衛

左傳曰晉故也高氏

書侵澄曰魯於衛無可聲
之罪故其師之出為無名

冬

衛侯鄭伯盟于曲濮

杜氏曰結叛晉也曲濮衛地高氏曰去年公侵鄭今年二

卿侵衛皆為晉故而士鞅又自帥師侵之故二君同為此盟以固其謀

從祀先公

左傳曰季寤公鉏極公山不狃皆不得志於季氏叔孫輒無寵於叔孫氏叔仲

志不得志於魯故五人因陽虎陽虎欲去三桓以季寤更季氏以叔孫輒更叔孫氏己更孟氏順祀

先公而祈焉劉氏曰從祀先公正也所以從祀先

公則非正矣其非正奈何季氏專魯陽虎專季氏

欲去三桓而代之從祀先公以說焉非能正者也杜氏曰從順也先公閔公僖公也將正二公之位

次所順非一親盡故通言先公

盜竊寶玉大弓

左傳曰陽虎將享季氏於蒲圃而殺之戒都車成宰公歛處父告孟

孫曰季氏戒都車何故孟孫曰吾弗聞處父曰然則亂也必及於子先脩諸陽虎前驅林楚御桓子虞人以鉞盾夾之陽越殿將如蒲圃桓子咋謂林楚曰而先皆季氏之良也爾以是繼之對曰臣聞命後陽虎為政魯國服馬達之徵死死無益於主桓子曰何後之有而能以我適孟氏乎對曰不敢愛死懼不免主桓子曰往也孟氏選國人之壯者三百人以為公期築室於門外林楚怒馬及衢而騁陽越射之不中有自門間射陽越殺之陽虎劫公與武叔以伐孟氏公歛處父帥成人自上東門入與陽氏戰於南門之內弗勝又戰於棘下陽氏敗陽虎說甲如公宮取寶玉大弓以出入於譙陽闕以叛杜氏曰盜謂陽虎也家臣賤名氏不見故曰盜寶玉夏后氏之璜大弓封父之繁弱蘇氏曰

陽虎將殺季孫斯不勝而出取寶玉大弓於公宮
以行其稱盜陪臣也寶玉大弓魯之分器也是時
陽虎以鄆讎龜陰叛奔齊十年侯犯以邱叛及昭
十二年南蒯以費叛皆以賤不書其書竊寶玉大
弓何也分器重於地也分器重於地者賤貨而貴
命也常山劉氏曰寶玉大弓天子所錫先君之分
器藏於國子孫世世保之不可失墜而為盜所竊
國慢無政可知矣胡氏曰古者告終易代弘璧琬
琰天球夷玉兂之戈和之弓垂之竹矢莫不陳列
非直為美觀也先王所寶得及其身能全而歸之
則可以免矣魯失其政陪臣擅權雖先公分
器猶不能守而盜得竊諸公宮其能國乎

經書月五書日一大衍歷正月甲子大甲戌冬至
二月甲午小三月癸亥大四月癸巳小五月壬戌
大六月壬辰小七月辛酉大戊辰八日八月辛卯
小九月庚申大十月庚寅小十一月己未大十二

月己丑小長曆
是年閏二月

九年

庚子敬王十九年。晉霸定十一。蔡昭十八。
曹伯陽元年。衛靈三十四。鄭獻十三卒。

陳閔公越元年。杞僖五。宋景十六。齊景
四十七。秦哀三十六卒。楚昭十五。吳闔廬

四十

春

王正月

夏

四月

戊申鄭伯薨卒

黃勅邁切公作嘖。獻公也在位十三年子勝嗣是為聲公

得寶玉大弓

左傳曰陽虎歸寶玉大弓伐陽闕陽虎使焚萊門師驚犯之而出奔齊請

師以伐魯曰三加必取之齊侯將許之鮑文子諫曰魯免其疾而君又收之無乃害乎齊侯執陽虎虎遂奔晉適趙氏仲尼曰趙氏其世有亂乎公羊傳曰何以書國寶也喪之書得之書杜氏諤曰直書曰得以明其失而復得不正其得之於盜也

六月

葬鄭獻公

秋

齊侯衛侯次于五氏

左傳曰齊侯伐晉夷儀晉車千乘在中牟衛侯將如五氏

卜過之龜焦衛侯曰可也衛車當其半寡人當其半敵矣乃過中牟中牟人欲伐之衛褚師圍亡在中年曰衛雖小其君在焉未可勝也齊師克城而驕其帥又賤遇必敗之不如從齊乃伐齊師敗之齊侯致禚媚杏於衛杜氏曰五氏晉地任氏曰非伐晉也不書伐而書次者晉實大國未敢輕伐始盟于沙中次于五氏又次于垂葭至哀公元年而後伐其欲有所逞也久矣

秦伯卒

哀公也在位二十六年世子早卒世子之子嗣是為惠公

冬

葬秦哀公

襄陵許氏曰秦自晉悼以後寢不見於春秋則知秦益退保西戎軍旅禮聘之

事不交於
中國矣

經書月三書日一大衍歷正月戊午大己卯冬至
二月戊子大三月戊午小四月丁亥大戊申二十
二日五月丁巳小六月丙戌大七月丙辰小八月
乙酉大九月乙卯小十月甲申大閏月甲寅小十
一月癸未大十
二月癸丑小

十年 辛丑敬王二十年。晉霸定十二。蔡昭十九。
○曹陽二。衛靈三十五。鄭聲公勝元年。
陳閔二。杞僖六。宋景十七。齊景四十八。
○秦惠公元年。楚昭十六。吳閔廬十五。

春

王三月

及齊平

杜氏曰平前八年再侵齊之
怨呂氏曰及齊平我志也

夏

公會齊侯于夾谷

夾公穀作類後同。左傳曰公會齊侯于祝其

犂彌言於齊侯曰孔丘知禮而無勇若使萊人以兵劫魯侯必得志焉齊侯從之孔丘以公退曰士兵之兩君合好而裔夷之俘以兵亂之非齊君所以命諸侯也裔不謀夏夷不亂華俘不干盟兵不偪好於神為不祥於德為愆義於人為失禮君必不然齊侯聞之遽辟之齊侯將享公孔丘謂梁丘據曰齊魯之故吾子何不聞焉事既成矣而又享之是勤執事也且犧象不出門嘉樂不野合饗而既具是棄禮也若其不具用秕稗也用秕稗君辱棄禮名惡子盍圖之夫享所以昭德也不昭不如

其已也乃不果享張氏曰夾谷魯地漢東海祝其縣有夾山今海州懷仁縣

公至自夾谷

穀梁傳曰其至何也危之也其危之奈何頰谷之會孔子相焉兩君就壇

兩相相揖齊人鼓譟而起欲以執魯君孔子歷階而上不盡一等而視歸乎齊侯曰兩君合好夷狄之民何為來為命司馬止之齊侯逡巡而謝罷會齊人使優施舞於魯君之幕下孔子曰笑君者罪當死使司馬行法焉首足異門而出高氏曰夾谷之會齊侯使萊人以兵劫故書至以危之

晉趙鞅帥師圍衛

左傳曰報夷儀也杜氏曰前年齊為衛伐晉夷儀故伐衛以為

報襄陵許氏曰使晉有以報齊則衛可無用兵而服也今圍衛而不能服則徒足以堅齊之從而己矣

齊人來歸鄆謹龜陰田

謹火官切龜陰下穀有之字○張氏曰鄆即昭公時

齊取以居公者謹見桓三年杜氏以為齊地濟北蛇丘縣有謹亭而汶水經濟北至東平須昌入濟泰山博縣有龜山今在泗水東北七十里陰田在山北也鄆謹二邑與龜陰俱在汶水北杜氏曰三邑皆汶陽田也何氏曰齊侯自夾谷歸謂晏子曰寡人獲過於魯侯如之何晏子曰君子謝過以質小人謝過以文齊嘗侵魯四邑請皆還之程子曰齊人服義而來歸之故書來歸胡氏曰齊人前此嘗歸濟西田矣從此嘗歸謹及闡矣而此獨書來歸何也曰歸者魯請而得之也曰來歸者齊人心服而歸之也桓公以義責楚而楚人求盟夫子以禮責齊而齊人歸地皆書曰來序續也

叔孫州仇仲孫何忌帥師圍郕

左傳曰初叔孫成子欲立武叔公若

蘇固諫曰不可成子立之而卒公南使賊射之不能殺公南為馬正使公若為郈宰武叔既定使郈馬正侯犯殺公若弗能其圍人曰吾以劍過朝公若必曰誰之劍也吾稱子以告必觀之吾偽固而授之末則可殺也使如之公若曰爾欲吳王我乎遂殺公若侯犯以郈叛武叔懿子圖郈弗克杜氏曰犯以不能副武叔之命故叛郈叔孫氏邑任公輔曰東平無鹽縣東南有郈縣張氏曰無鹽在今鄆州東城縣東

秋

叔孫州仇仲孫何忌帥師圍郈

郈公作費。左傳曰二子及齊師復

圍郈弗克叔孫謂郈工師駟赤曰郈非唯叔孫氏之憂社稷之患也將若之何駟赤謂侯犯曰居齊

魯之際而無事必不可矣子盍求事於齊以臨民不然將叛侯犯從之齊侯至駟赤與邠人為之宣言於邠中曰侯犯將以邠易於齊齊人將遷邠民衆克懼駟赤謂侯犯曰衆言異矣子不如易於齊與其死也猶是邠也而得紓焉何必此齊人欲以此偪魯必倍與子地且盍多舍甲於子之門以脩不虞侯犯曰諾乃多舍甲焉侯犯請易於齊齊有司觀邠將至駟赤使周走呼曰齊師至矣邠人駭介侯犯之門甲以圍侯犯駟赤將射之侯犯止之曰謀免我侯犯請行許之駟赤先如宿侯犯殿每出一門邠人閉之及郭門止之曰子以叔孫氏之甲出有司若誅之羣臣懼死駟赤曰叔孫氏之甲有物吾未敢以出犯謂駟赤曰子止而與之數駟赤止而納魯人侯犯奔齊齊人乃致邠胡氏曰侯犯以邠叛不書於策再書二卿帥師圍邠則疆亦可知矣三家專魯為曰既久至是家臣爭叛三

子知傾公室以自張而不知家隸之
擬其後也據事直書深切著明矣

宋樂大心出奔曹

宋公使樂大心盟於晉且逆樂

祁之尸辭偽有疾乃使向巢如晉盟且逆子梁之
尸子明謂桐門右師出曰吾猶衰經而子擊鍾何
也右師曰喪不在此故也既而告人曰已衰經而
生子余何故舍鍾子明聞之怒言於公曰右師將
不利戴氏不肯適晉將作亂不然無疾乃逐桐門
右師高氏曰辭使非大譴而讒言乘之罪累上矣

宋公子地出奔陳

地公作池下同。左傳曰宋公
子地嬖遂富獵十一分其室而

以其五與之公子地有白馬四公嬖向魋魋欲之
公取而朱其尾鬣以與之地怒使其徒扶魋而奪
之魋懼將走公閉門而泣之目盡腫母弟辰曰子
分室以與獵也而獨卑魋亦有頗焉子為君禮不

過出竟君
必止子

冬

齊侯衛侯鄭游速會于安甫

安公作宰。○高氏曰：三國皆叛晉而會於

此者蓋結謀也。張氏曰：安甫齊地。按今屬鄆州平陰縣。

叔孫州仇如齊

左傳曰：齊侯享之曰：子叔孫若使郕在君之它竟，寡人何知焉？屬與

敝邑際故，敢助君憂之。對曰：非寡人之望也。所以事君，封疆社稷，是以敢以家隸勤君之執事。夫不令之臣，天下之所惡也。君豈以為寡君賜杜氏曰：謝致郕也。高氏曰：夾谷之會，歸我鄆，謹龜陰田。侯犯以郕奔齊。齊又致郕，是以叔孫州仇如齊謝焉。

宋公之弟辰暨仲佗石彊出奔陳

暨下公穀有宋字彊苦侯切○

左傳曰公子地出奔陳公弗止辰為之請弗聽辰曰是我廷吾兄也吾以國人出君誰與處母弟辰暨仲佗石彊出奔陳澄曰地氏公子者已三命也辰不氏公子未三命也曰宋公之弟著其屬之貴胡氏曰宋公以嬖魋故而失二弟無親親之恩辰以兄故帥其大夫出奔無尊君之義仲佗石彊見脅於辰不能自立無大臣之節孫氏曰交讎之

經書月一書日無大衍歷正月壬午大甲午冬至二月壬子小三月辛巳大四月辛亥小五月庚辰大六月庚戌大七月庚辰小八月己酉大九月己卯小十月戊申大十一月戊寅小十二月丁未大長歷是年閏六月

十有一年

壬寅敬王二十一年。晉霸定十三。蔡昭二十。曹陽三。衛靈三十六。鄭聲

二。陳閔三。杞僖七。宋景十八。齊景四十九。秦惠二。楚昭十七。吳闔廬十六。

春

宋公之弟辰及仲佗石彊公子地自陳入于蕭以

叛高氏曰始辰之出奔非其本心故書暨今入於蕭以叛則變其初心故書及

夏

四月

秋

宋樂大心自曹入于蕭

左傳曰宋公母弟辰暨仲佗石彊公子地入于蕭以

叛樂大心從之大為宋患寵向魑故也胡氏曰四卿在蕭以叛而大心自曹從之不書叛而曰入于

蕭其叛

可知也

冬

及鄭平

左傳曰始叛晉也杜氏曰平六年侵鄭取匡之怨襄陵許氏曰夫晉之為晉自若也

定亦未有它惡而諸侯離心焉者政在多門貨賄譏慝汨昏其間則無以令天下極於執樂祁也

叔還如鄭泣盟

還音旋○叔還叔弓魯孫及鄭平者我欲之故鄭卿不來盟而我卿

住泣盟也

經書月一書日無大衍歷正月丁丑小庚寅冬至
二月丙午大三月丙子小四月乙巳大五月乙亥
小六月甲辰大七月甲戌小八月癸卯大九月癸
酉小十月壬寅大十一月壬申小十二月辛丑大
十有二年

癸卯敬王二十二年。晉霸定十四。蔡昭二十一。曹陽四。衛靈三十七。鄭

春

聲三。陳閔四。杞僖八。宋景十九。齊景五十。秦惠三。楚昭十八。吳闔廬十七。

薛伯定卒

襄公也在位十三年子比嗣

夏

葬薛襄公

春秋書薛卒者三葬者一不日不月史文畧也

叔孫州仇帥師墮郕

左傳曰仲由為季氏宰將墮三都於是叔孫氏墮郕高郵

孫氏曰墮毀也是時三桓之邑皆為城以自固故其家臣因之以叛昭十三年叔弓圍費十年夏秋郕凡再圍於是一墮毀之高氏曰魯懲侯犯之難以其險固怨為國患故墮之墮之而至於師師是邑之力足以抗也

衛公孟彊帥師伐曹

左傳曰克郊杜氏曰彊孟縶子

季孫斯仲孫何忌帥師墮費

左傳曰季氏將墮費公山不狃叔孫輒帥

費人以襲魯公與三子入於季氏之宮登武子之臺費人攻之弗克入及公側仲尼命申句須樂頎下伐之費人北國人追之敗諸姑蔑二子奔齊遂墮費公羊傳曰孔子行乎季孫三月不違曰家不

藏甲邑無百雉之城於是帥師墮郈墮費何氏曰
郈叔孫氏所食邑費季孫氏所食邑二大夫宰吏
數叛患之以問孔子孔子曰陪臣執國命采長數
叛者生邑有城池之固家有甲兵之藏故也季氏
說其言而墮之故君子時然後言人不厭其言書
者善公復古制弱臣勢也胡氏曰三桓既微陪臣
擅命憑恃其城數有叛者三家亦不能制也而問
於仲尼遂墮三都是謂以禮為國可以為之兆也
高氏曰前此未有墮邑之事墮邑亂之至也傳以
為孔子之功是不然魯以大夫專國政不臣諸侯
陪臣專家政不臣大夫上下循習之所致非一日
矣苟欲其不叛在正其本而已諸侯正則大夫正
矣大夫正則陪臣正矣何城池甲兵之患哉唯叔
孫季孫不知出此故墮郈墮費所以讖也而傳反
歸功於孔子不思甚矣昔者季氏將伐顓臾孔子
曰是社稷之臣也何以伐為冉求曰顓臾固而近

於費孔子曰季孫之憂不在顓臾而在蕭牆之內也今焉費叛豈非蕭牆之內歟然弗徂之叛召孔子欲往子路曰何必公山氏之之也孔子曰夫召我者而豈徒哉如有用我者吾其為東周乎孔子之旨遠矣仲由所不及也

秋

大雩

冬

十月

癸亥公會齊侯盟于黃

齊公作晉。杜氏曰結叛晉也。張氏曰黃齊地。

十有一月

丙寅朔日有食之

公至自黃

十有二月

公圍成

左傳曰將墮成公歛處父謂孟孫墮成齊人必至於北門且成孟氏之保障也無成

是無孟氏也

子偽不知我將不墮公圍成弗克高氏曰天子令行乎天下諸侯令行乎一國故天子

未嘗有伐諸侯者

諸侯亦未嘗有伐其國之邑者以其令之則從也春秋之時天下無王而諸侯擅

命故有王伐鄭之事

陪臣擅國而權在私家故有公圍成之事叔孫既墮郈矣季氏既墮費矣孟氏

將墮成而其臣不服至是公親圍之亦不克墮經書三子墮邱墮費而獨書公圍成著公之弱不能墮成也

公至自圍成

襄陵許氏曰竟內不至至圍成者魯與之如列國矣高氏曰春秋書公行

凡一百七十六而書至者八十有二皆危之也隱公當春秋之始天下之亂未甚故雖有會盟侵伐未嘗至也至桓二年及戎盟于唐十六年會諸侯伐鄭始於此至馬蓋桓公弑君自立敢外交強隣又助篡伐鄭踰年始還故危之也莊僖會盟最數而無至者時齊侯外攘強暴內安諸夏屢合諸侯不以兵車故魯君之出無它虞也唯莊丘之盟過三時淮之會踰年故至爾成襄之間齊楚爭霸諸侯日尋干戈故盟會侵伐鮮不至焉及會于蕭魚之後楚雖稍息然中國皆大夫專政魯亦有三桓

之患至有敢逐其君而自廢置者故終春秋之世
公出罕有不至者此雖伐邑亦至焉可謂危亂之
世矣

經書月三書日二大衍歷正月辛未大乙未冬至
二月辛丑小三月庚午大四月庚子小五月己巳
大六月己亥小七月戊辰大閏月戊戌小八月丁
卯大九月丁酉小經十月癸亥在此月十月丙寅
大日食經書十一月朔食蓋春秋置閏在日食後
故差一月也十一月丙申小十二月乙丑大長
是年閏十一月癸亥十月二十七日

十有三年

甲辰敬王二十三年。晉霸定十五。蔡昭二十二。曹陽五。衛靈三十八。鄭

聲四。陳閔五。杞僖九。宋景二十。齊景五十一。秦惠四。楚昭十九。吳闔廬十八。

春

齊侯衛侯次于垂葭

穀無衛侯葭公作瑕。左傳曰使師伐晉將濟河諸大夫

皆曰不可邴意茲曰可銳師伐河內傳必數日而後及絳絳不三月不能出河則我既濟水矣乃伐河內齊侯欲與衛侯乘與之宴而駕乘廣載甲馬使告曰晉師至矣齊侯曰比君之駕也寡人請攝乃介而與之乘驅之或告曰無晉師乃止杜氏曰二君將使師伐晉次垂葭以為援垂葭一名郟氏高平鉅野縣有郟亭張氏曰今屬濟州高氏曰書次于垂葭與九年次于五氏同

夏

築蛇淵囿

襄陵許氏曰魯政不修而非時勤民築囿奉己而已志不及國也夫囿成弗克

歸而力此何振之有高氏曰魯國之圓一而已
成築鹿園昭築郎園定築蛇淵園何圓之多也

大蒐于比蒲

比音毗○高氏曰圓所以養禽獸待
畋獵也築園蛇淵今乃蒐于比蒲則

又何為哉魯既叛晉而三桓
日懼人之圖已故數蒐焉

衛公孟彊帥師伐曹

高氏曰衛此伐曹者曹不叛
晉故也靈公志在軍旅之事

而不知以禮為
國故亟戰如此

秋

晉趙鞅入于晉陽以叛

左傳曰晉趙鞅謂邯鄲午
曰歸我衛貢五百家吾舍

諸晉陽午許諾歸告其父兄父兄皆曰不可衛是
以為邯鄲而寘諸晉陽絕衛之道也不如侵齊而

謀之乃如之而歸之于晉陽趙孟怒召午而因諸
晉陽使其從者說劍而入涉賓不可乃使告邯鄲
人曰吾私有討於午也二三子唯所欲立遂殺午
趙授涉賓以邯鄲叛上軍司馬籍秦圍邯鄲邯鄲
午荀寅之甥也荀寅范吉射之姻也而相與睦故
不與圍邯鄲將作亂董安于聞之告趙孟曰先降
諸趙孟曰晉國有命始禍者死為後可也安于曰
與其害于民寧我獨死請以我說趙孟不可范氏
中行氏伐趙氏之官趙鞅奔晉陽晉人圍之公羊
傳曰晉荀寅與士吉射君側之惡人也趙鞅取晉
陽之甲以逐荀寅士吉射曷為以叛言之無君命
也趙氏曰趙鞅之入晉陽報范中行也而書曰叛
人臣不當專土也高氏曰據土背君曰叛鞅殺邯
鄲午固有罪矣范中行氏特以姻親之故與師以
攻鞅故鞅入晉陽以拒之因興晉陽之甲託辭以
逐君側之惡而不知投鼠忌器之義故聖人正名

曰叛以著其不由君命而專土興兵之罪張氏曰晉陽太原府并州也

冬

晉荀寅士吉射入于朝歌以叛

荀寅下公有及字左傳曰范臯夷

無寵於范吉射而欲為亂於范氏梁嬰父嬖於知文子欲以為卿韓簡子與中行文子相惡魏襄子亦與范昭子相惡故五子謀將逐荀寅而以梁嬰父代之逐范吉射而以范臯夷代之荀躒言於晉侯曰君命大臣始禍者死載書在河今三臣始禍而獨逐鞅刑己不鈞矣請皆逐之荀躒韓不信魏曼多奉公以伐范氏中行氏弗克二子將伐公齊高彊曰三折肱知為良醫唯伐君為不可民弗與也我以伐君在此矣三家未睦可盡克也克之君將誰與若先伐君是使睦也弗聽遂伐公國人助

公二子敗從而伐之荀寅士吉射奔朝歌張氏曰
朝歌晉地衛州衛縣西有朝歌城南有牧野胡氏
曰晉主夏盟威服天下及大夫專政賄路公行內
外離析示威平丘而齊叛辭請召陵而蔡叛盟于
沙鹹而鄭叛次于五氏而衛叛涇盟于鄭會于夾
谷秋于黃而魯叛諸侯叛于外大夫叛于內故奔
于晉陽而趙鞅叛入于朝歌而荀寅士吉射叛以
晉國之大天下莫彊焉邦分崩而不能守也三卿
內叛直書于策見其效也

晉趙鞅歸于晉

左傳曰韓魏以趙氏為請趙鞅入于絳盟于公宮高氏曰此蓋二子

既出晉侯自謂趙鞅保其邑以違荀范之難實非
叛者故許之歸也先儒以歸為善辭遂謂鞅有叛
迹而無叛心春秋先正其罪以勵臣節此許其歸
以廣君恩是不然叛者人臣之大惡也脫使鞅初

入晉陽本拒范中行氏而非有叛君之心然人臣
無君命輒據土興兵此豈可赦乎使後世亂臣賊
子敢興兵向闕以除君側惡人為名而實欲脅君
專權者皆先儒啟之也可不辨乎況衛孫林父亦
書歸爾何善之有蘇氏曰鞅之言歸寅吉射既出
則無難也鞅寅吉射之叛其罪均也鞅以有助故
得復寅吉射以無援故終叛春秋無所與也澄按
左氏傳哀公三年十月晉趙鞅圍郕郕師于其南
荀寅伐其郛使其徒自北門入已犯師而出癸丑
奔郕郕四年九月趙鞅圍郕郕十一月郕降荀
寅奔鮮虞趙稷奔臨十二月弦施逆之遂墮臨國
夏伐晉取邢任欒鄫逆時陰人孟壺口會鮮虞納
荀寅于柏人五年春晉圍
柏人荀寅士吉射奔齊

薛弒其君比

在位一年惠
公夷嗣立

經書月無書日無大衍歷正月乙未大庚子冬至
二月乙丑小三月甲午大四月甲子小五月癸巳
大六月癸亥小七月壬辰大八月壬戌小九月辛
卯大十月辛酉小十一月庚寅大十二月庚申小
十有四年乙巳敬王二十四年。晉霸定十六。蔡昭二十三。曹陽六。衛靈三十九。鄭
聲五。陳閔六。杞僖十。宋景二十一。齊景
五十二。秦惠五。楚昭二十。吳闔廬十九

春

衛公叔戌來奔

左傳曰初衛公叔文子朝而請事靈公退見史鰌而告之史鰌曰子

必禍矣子富而君貪罪其及子乎文子曰然吾不
先告子是吾罪也君既許我矣其若之何史鰌曰
無害子臣可以免富而能臣必免於難上下同之
戍也驕其亡乎富而不驕者鮮吾唯子之見驕而

不已者未之有也。戌必與焉。及文子卒，衛侯始惡於公叔戌，以其富也。公叔戌又將去夫人之黨，夫人慙之，曰：「戌將為亂。」衛侯遂公叔戌，與其黨故趙陽奔宋。戌來奔，胡氏曰：「靈公無道，不能正家，以喪其大臣。戌又以富見惡於衛侯，夫富者怨之府也。使戌積而能散，以財發身，不為貪人之所怨，於以保其爵位，儻庶幾乎？」

衛趙陽出奔宋

衛公作晉。杜氏曰：陽趙厲孫。

二月

辛巳，楚公子結、陳公孫佗人帥師滅頓，以頓子牂

歸。

公孫佗人，孫公作子牂子，即切公作牂。左傳曰：頓子牂欲事晉，背楚而絕。陳好楚，滅頓。杜氏

曰小不事
大所以亡

夏

衛北宮結來奔

左傳曰公叔戌之故也杜氏曰亦黨公叔戌皆惡之高氏曰衛靈陀

耳於閨以奔其世臣又及其所與是以其國聽之也

五月

於越敗吳于攜李

攜音醉公作醉。左傳曰吳伐越越子勾踐禦之陳于攜李勾

踐患吳之整也使死士再禽焉不動使罪人三行屬劍於頸遂自剄師屬之目越子因而伐之大敗

之杜氏曰吳郡嘉興縣南醉李城張氏曰攜李吳地今為秀州地所

吳子光卒

左傳曰靈姑浮以戈擊闔廬闔廬傷將指取其一屨還卒於陘去攜李七里夫差

使人立於庭苟出入必謂已曰夫差而忘越王之殺而父乎則對曰唯不敢忘三年乃報越襄陵許氏曰書謂李之敗用見光玩兵滅身以為殘民伐國之戒

公會齊侯衛侯于牽

牽公作堅。左傳曰晉人圍朝歌公會齊侯衛侯于脾上

梁之間謀救范中行氏折成鮒小王桃甲率狄師以襲晉戰於絳中不克而還士鮒奔周小王桃甲入於朝歌張氏曰齊景公欲求霸誅晉之亂臣以正其國可也當是時孔子已去魯故會齊衛合謀救范中行氏三國之君同為范中行為會而助不衷也杜氏曰魏郡黎陽縣東北有牽城

公至自會

秋

齊侯宋公會于洮

左傳曰范氏故也襄陵許氏曰齊宋魯衛崇獎亂逆謀動干戈

大義亡矣杜氏曰洮曹地

天王使石尚來歸脤

脤市軫切。公羊傳曰石尚天子之士也。脤俎實也。腥曰

脤。熟曰臠。杜氏曰脤祭社之肉。盛以脤器以賜同姓。劉氏曰脤臠以親兄弟之國。受脤禮也。歸脤非禮也。高氏曰周自季子來聘之後。王命不復加於諸侯矣。今敬王有事於社魯未嘗有敵王所愾之功。而天王特使石尚忽為此舉。雖天子損禮之甚。是猶有盛王之意也。聖人於周眷眷如此。故於使歸脤以見焉。曰天子之在唯祭與號而已。

衛世子蒯瞶出奔宋

蒯瞶苦怪切。瞶五怪切。○左傳曰：衛侯爲夫人南子召宋朝。

會於泚。太子蒯瞶獻孟于齊。過宋野，野人歌之曰：『既定爾妻豬，盍歸吾艾。』太子羞之，謂戲陽速曰：『從我而朝。』少君少君見我，我顧乃殺之。速曰：『諾。』乃朝。夫人夫人見太子，太子三顧，速不進。夫人見其色，啼而走曰：『蒯瞶將殺余。』公執其手以登臺。太子奔宋。太子告人曰：『戲陽速禍余。』戲陽速告人曰：『太子則禍余。』太子無道，使余殺其母，余不許。將戕於余，若殺夫人，將以余說余，是故許而不爲。以紆余死。劉氏曰：『左氏叙蒯瞶事云云，蒯瞶雖不善謀，安有此事哉？』且殺夫人，蒯瞶獨得全乎？彼所羞者，以夫人名惡也。如殺其母爲惡，愈大反不知可羞乎？蓋蒯瞶聞野人之歌，其心慙焉，則以謂夫人夫人惡其斥己之淫，則啼而走，言太子將殺余，以誣之。靈公惑於南子所言，必聽從，故外則召宋朝，內則

逐公叔戌趙陽使不恥召宋朝固亦不難逐蒯贖
矣此其真也不當如左氏所記又蒯贖出乃奔宋
宋南子家也蒯贖負殺南子之名而走又入其家
使真有其事者敢乎哉此亦一證也常山劉氏曰
靈公聽南子之譖謂蒯贖欲殺母不為辨明以致
其出奔靈公之罪也張氏曰劉氏明蒯贖之不弑
母當合劉質夫解觀之自古讒婦之誣其子多矣
考二劉之言足以知左氏所記乃南子之讒言而
非當時之實錄也澄曰蒯贖不能自明而出奔其
黨皆逐戲陽速太子家臣也非逐則殺矣速反覆
小人一聞夫人之誣言即為證成其事曰太子實
使余為此而余弗為以自黨於夫人而免己之禍
靈公既不察夫人之誣時人又誤聽戲陽速之證
莫能辨其情實故左氏所記如此劉氏乃能辨明
於千載之後其
卓識君子哉

衛公孟彊出奔鄭

左傳曰太子奔宋盡逐其黨故公孟彊奔鄭自鄭奔齊高氏曰

其年志公孟帥師此衛國用事之卿靈公疑其為
崩殯之黨而逐之夫衛國一歲之中出奔者五人
而衛侯獨與南子
處靈公之無道也

宋公之弟辰自蕭來奔

高氏曰宋公不能容一弟
既使為奔亡之臣又使為

叛逆之臣一身無所容懼洮之謀逐
來奔魯以求入察辰之本心非叛也

大蒐于比蒲

高氏曰凡蒐狩皆與衆共之雖不善
公公在可知然公狩于郎公及齊人

狩于禚皆特書公此又專罪公也張氏曰公親蒐
矣而不書公以軍政不屬公而專於三家則季孫
孟孫氏之所為也高郵孫氏曰春秋田狩之事公
行之者必書公公觀魚于棠公狩于郎隱桓之時

政猶自公出也自昭之紅菟政在三桓菟田之禮雖公自行皆曰大菟而不曰公焉所以見公之不得為政而大
夫專國也

邾子來會公

高氏曰比蒲之菟三家之事故特言會公以別之此與莊四年蕭叔朝公

同蓋未嘗期約因來朝偶遇與公為會爾

此年無冬
史闕文

城莒父及霄

杜氏曰公叛晉助范氏故懼而城二邑張氏曰皆魯邑子夏嘗為莒父宰

經書月二書日一大衍歷正月己丑大乙己冬至二月己未小辛己二十三日三月戊子大四月戊午小五月丁亥大六月丁巳大七月丁亥小八月丙辰大九月丙戌小十月乙卯大十一月乙酉小

十二月甲寅大長
歷是年閏十二月

十有五年

丙午敬王二十五年。晉霸定十七。蔡昭二十四。曹陽七。衛靈四十。鄭聲

六。陳閔七。杞僖十一。宋景二十二。齊景五十三。秦惠六。楚昭二十一。吳夫差元年

春

王正月

邾子來朝

左傳曰邾隱公來朝子貢觀焉邾子執玉高其容仰公受玉卑其容俯子貢曰

以禮觀之二君其皆有死亡焉正月相朝而皆不度心已亡矣嘉事不體何以能久高仰驕也卑俯替也驕近亂替近疾君為主其先亡乎高氏曰去年所以會公比蒲者欲其來朝正故也

鼯鼠食郊牛牛死改卜牛

公羊傳曰曷為不善所食漫也趙氏曰上元二

年因避地旅於會稽時牛災
小鼠噬牛纔傷皮膚輒死

二月

辛丑楚子滅胡以胡子豹歸

左傳曰吳之入楚也胡子盡俘楚邑之近

胡者楚既定胡子豹又不事楚曰存
亡有命事楚何為多取費焉楚滅胡

夏

五月

辛亥郊

公羊傳曰曷為以夏五月郊三卜之運也
何氏曰運轉也已卜春三正不吉復轉卜

夏三月周五月得二吉故五月郊高氏曰魯郊當在孟春今以改卜牛在滌三月故至五月乃郊

壬申公薨于高寢

穀梁傳曰高寢非正也杜氏曰高寢宮名襄陵許氏曰內卒凡

十四公得正而薨者唯莊宣成

鄭罕達帥師伐宋

罕公作軒。左傳曰敗宋師于老丘杜氏曰宋公子地奔鄭鄭

為之伐宋欲取地以處之事見哀十二年

齊侯衛侯次于渠蔭

渠公作遽。左傳曰謀救宋也襄陵許氏曰齊衛新與宋

鄭同盟叛晉故為宋出請為鄭次止其不言救為其不誠於救也高氏曰謀救宋而不果其文意與五氏垂

葭同

邾子來奔喪

公羊傳曰奔喪非禮也高氏曰來奔魯喪畏三家之彊而求說於魯爾

秋

七月

壬申姒氏卒

姒穀作弋下同。左傳曰不稱夫人不赴且不祔也杜氏曰姒氏定公夫人

人也

八月

庚辰朔日有食之

九月

滕子來會葬

呂氏曰邾子來奔喪畏魯甚也滕差遠而大於邾故但來會葬此專以利

害彊弱為國者也高氏曰此亦畏三桓故爾於定公何有哉

丁巳葬我君定公雨不克葬

戊午日下昃乃克葬

昃穀作積。穀梁傳曰葬既有日不為雨止禮也雨不克

葬喪不以制也高氏曰不克葬無脩之甚也義見宣八年然彼言日中而克葬此言日下昃乃克葬日中則裕於日昃矣君子之於親不忍一日離也故葬日虞所以寧親也日下昃則失虞之時矣

辛巳葬定公

左傳曰不稱小君不成喪也杜氏曰公未葬而夫人薨煩於喪禮不赴不

祔故不稱小君臣子怠慢也薛氏曰定如定夫人也卒不書夫人葬不書小君殺夫人之禮也卒之

而葬謚配先公臣子而不以為君夫人其可乎澄
曰左氏以定如為正夫人而諸家皆以為定公之
妾今按如氏與公同謚其為正夫人也審矣僖昭
宣三公之母皆妾也而稱夫人薨稱葬小君欲致
隆於君母雖越禮不顧也今如氏定公之夫人嗣
君之適母而乃不成其喪降殺其禮見三家之不
臣而蔑其君是以敢卑其母也

冬

城漆

杜氏曰邾庶其邑余氏曰前年冬城莒父此
年秋葬定公又葬定如冬城漆其勞民也甚

矣張氏曰城漆謀伐邾也定公之喪邾子來奔事
魯謹矣哀公初立不務善鄰而以土地之故勞民
力啟鄰怨二年取其回七年俘其君卒使吳人乘
間以伐其國齊人問罪而取讎闢利未得而害隨

之謀國如此其
不終也宜哉

經書月六書日七大衍歷正月甲申小辛亥冬至
經二月辛丑在此月二月癸丑大三月癸未小閏
月壬子大四月壬午小五月辛亥大經書郊不言
朔史逸之壬申二十二日六月辛巳小七月庚戌
大壬申二十三日八月庚辰小朔日食黃道星三
度太疆九月己酉大丁巳九日戊午十日十月己
卯大經書辛巳當在此月三日
十一月己酉小十二月戊寅大

春秋纂言卷十一

欽定四庫全書

春秋纂言卷十二

元 吳澄 撰

哀公

名蔣定公。子母定。如在位二十七年。其十四年春。春秋絕筆。

元年

丁未。敬王二十六年。○晉霸定十八年。○蔡昭二十五年。○曹陽八年。○衛靈四十一年。○鄭

聲七年。○陳閔八年。○杞僖十二年。○宋景二十三年。○齊景五十四年。○秦惠七年。○楚昭二十

二年。○吳夫差二年。

春

王正月

公即位

楚子陳侯隨侯許男圍蔡

左傳曰楚子圍蔡報柏舉也蔡人男女以辨使

疆於江汝之間而還蔡於是乎請遷于吳胡氏曰蔡嘗以吳師入郢壞宗廟徙陳器撻平王之墓矣至是楚國復寧帥師圍蔡降其衆遷其國楚子復讐也襄陵許氏曰蔡侯怨楚不思本務修德俟時而輕謀兵革以得志於大國是益禍也故蔡昭之智愧於勾踐矣杜氏曰隨世服於楚不通中國吳之入楚昭王奔隨隨人免之卒復楚國楚人德之使列於諸侯故得見經定六年鄭滅許此復見者蓋楚封之

麇鼠食郊牛改卜牛

牛下公有角字。杜氏曰不言所食所食非一處胡氏曰

改卜牛
不敬也

夏

四月

辛巳

郊

穀梁傳曰四月郊不時也范氏曰春秋書郊終於此高氏曰雖改卜牛猶非郊時况

公斬然在衰經之中輒行天子之禮以見上帝可乎胡氏曰天子祭天地諸侯祭社稷大夫祭五祀庶人祭其祖此定理也成王退念周公有大勲勞於天下而欲尊魯故賜以重祭得郊禘大雩魯郊常事不書聖人因其失禮之中又有失焉因事而書為後世戒其垂訓之義大矣

秋

齊侯衛侯伐晉

左傳曰齊侯衛侯會于乾侯救范氏也師及齊師衛孔圍鮮虞人伐

晉取棘蒲襄陵許氏曰楚得專封王道盡矣晉受衆伐霸統亡矣春秋之變至此而窮高氏曰五民垂葭之役聖人書次以存晉晉至是而益衰聖人不復以盟主待之矣書齊侯衛侯伐晉見霸統之絕而受諸侯之伐也以傳考之魯及鮮虞之師在馬春秋以齊衛首惡故沒魯而畧鮮虞也夫范中行氏者晉之卿也卿叛而不能制又豈能主諸侯乎無惑乎齊侯衛侯之見伐也蓋晉定公召陵之役不能得楚而蔡昭公以吳子勝於是齊鄭衛背之已而我睦齊鄭宋人効之俱叛晉者也文公之業掃地盡矣又十有三年吳人爭長於黃池雖欲為成景悼厲之世且不可得矣悲夫

冬

仲孫何忌帥師伐邾

觀定公之末邾之事魯至矣去歲邾子來奔喪今邾年而

逐伐之蓋魯人謀邾久矣利取其田不復知有禮義也

經書月二書日一大衍歷正月戊申小丙辰冬至二月丁丑大三月丁未小四月丙子大辛巳六日五月丙午小六月乙亥大七月乙巳小八月甲戌大九月甲辰小十月癸酉大十一月癸卯小十二月壬申大

二年

戊申敬王二十七年。晉霸定十九。蔡昭二十。十六。曹陽九。衛靈四十二卒。鄭聲八。

陳閔九。杞僖十三。宋景二十四。齊景五十五。秦惠八。楚昭二十三。吳夫差三。

春

王二月

季孫斯叔孫州仇仲孫何忌帥師伐邾取邾東田

及沂西田

邾火號切。左傳曰：伐邾，將伐絞，邾人愛其土，故賂以邾沂之田，而受盟。高氏

曰：定公之薨，邾子來奔，喪非能行禮也。知三家者欲并其地，故事魯不敢不恭。然卒不免，故元年伐邾。至是三卿同伐，而取邾沂之田。入春秋，未有伐國取田者也。師氏曰：前此嘗伐邾，取其田自邾水矣。今又取其邾東之田，猶以為未足，故又取沂西之田。則其貪欲無厭，必至於盡取，而後已可知也。以區區之邾國，而魯兩納其叛人之邑，三取其田，時無王，霸彊凌弱之亂，至於如此。

癸巳，叔孫州仇、仲孫何忌及邾子盟于句繹。

句，古侯切。

○杜氏曰句輝郛地劉氏曰蜀為三人伐而二人盟季孫臨之叔仲成之季孫之汰也蓋自謂猶君矣

夏

四月

丙子衛侯元卒

左傳曰初衛侯遊於郊子南僕公曰余無子將立女不對它日又謂

之對曰郕不足以辱社稷君其改圖君夫人在堂三揖在下君命祇辱靈公卒夫人曰命公子郕為太子君命也對曰郕異於他子且君沒於吾手若有之郕必聞之且亡人之子輒在乃立輒澄按靈公在位四十二年

滕子來朝

公新立故

晉趙鞅帥師納衛世子蒯瞶于戚

公羊傳曰戚者衛之邑也左傳者

曰使太子統八人衰經偽自衛逆者告於門哭而入遂居之穀梁傳曰帥師而納者有伐也以輒不受也胡氏曰凡公子出奔後而得國者順且易則曰歸有奉焉則曰自其難也則曰入不稱納况世子哉世子國之儲副位其所固有國其所宜若無所事乎納矣今趙鞅帥師以蒯瞶復國而書納者衛人拒之不受也高氏曰靈公卒衛人以世子在外遂立其子輒使輒知已之得立者以父為世子故因逆其父而還以位則子道得而亂息矣奈何他人納其父而反拒之邪凡奔者在外非有國逆不可入故趙鞅帥師納之其言納衛世子者名所納者正異乎趙盾納摎菑于邾也其言于戚者見

蒯賁為輒所拒而不得入于衛也張氏曰蒯賁無
弑母之事二劉氏嘗辯之於定十四年出奔宋之
傳矣春秋再以此世子書之則知蒯賁無罪故春秋
正其名而謂之世子也陸氏曰蒯賁雖奔而靈公
未嘗廢之

秋

八月

甲戌晉趙鞅帥師及鄭罕達帥師戰于鐵鄭師敗

績

鐵公作栗又作秩○左傳曰齊人輸范氏栗鄭
子姚子般送之士吉射逆之趙鞅禦之遇於戚

郵無恤御簡子衛太子為右登鐵上鄭人擊簡子
中肩斃於車中獲其露旗太子救之以戈鄭師北

獲溫大夫趙羅太子復伐之鄭師大敗
獲齊粟千車杜氏曰鐵衛地在戚城南

冬

十月

葬衛靈公

七月而葬父子爭國故也

十有一月

蔡遷于州來

高氏曰吳滅州來今壽春府下蔡縣是其地也初武王封叔度於汝南上

蔡蔡叔

以叛被誅成王復以封其子仲焉及平侯卒徙于新蔡至昭侯乃徙九江下蔡即州來是也

蔡已降于楚復背楚而請遷于

吳吳人許之故以自遷為文

蔡殺其大夫公子駟

左傳曰吳洩庸如蔡納聘而稍納師師畢入衆知之蔡侯

告大夫殺公子駟以說杜氏曰元年蔡請遷于吳中悔故因聘襲之殺駟以說吳言不時遷駟之為胡氏曰楚既降蔡矣復背楚請遷于吳而又自悔也蔡介於吳楚二大國之間背楚誑吳及其事急又委罪於執政駟其以請遷為非者乎而委之罪誰復敢有盡忠謀國者哉

經書月五書日三大衍歷正月壬寅大辛酉冬至二月壬申小癸巳二十二日三月辛丑大四月辛未小丙子六日五月庚子大六月庚午小七月己亥大八月己巳小甲戌六日九月戌戌大十月戌辰小十一月丁酉大十二月丁卯小長歷是年閏十一月

三年

己酉敬王二十八年○晉霸定二十○蔡昭二
十七○曹陽十○衛出公輒元年○鄭聲九○

陳閔十。杞僖十四。宋景二十五。齊景五十六。秦惠九。楚昭二十四。吳夫差四。

春

齊國夏衛石曼姑帥師圍戚

左傳曰齊衛圍戚求援於中山高氏曰曼

姑以臣圖君為子圖父逆亂人倫莫甚於此齊國夏帥師助之故為惡首齊與晉為仇若蒯賁入則衛從晉矣此齊所以助輒也襄陵許氏曰晉以君臣稱兵而齊為臣伐君衛以父子爭國而齊助子圖父以是令於諸侯君子是以知齊之將亂也胡氏曰為輒者奈何宜辭於國曰若以父為有罪將從王父之命則有社稷之鎮公子在我焉得為君以為無罪則國乃世子之所有也天下豈有無父哉之國

夏

四月

甲午地震

五月

辛卯桓宮僖宮災

左傳曰司繹火火踰公宮桓僖災孔子在陳聞火曰其桓僖乎

杜氏曰桓僖親盡而廟不毀宜為天所災劉氏曰桓僖久矣其宮曷為不毀三家者出於桓立於僖以是為悅者也高郵孫氏曰桓公者哀公之十世祖也僖公者哀公之七世祖也諸侯五廟而十世七世之廟存焉非禮矣高氏曰諸侯五廟親盡則毀桓僖不毀三家者存之僭天子也聖人因其災

而并錄之君子於是乎知有天道也

季孫斯叔孫州仇帥師城啟陽

啟公作開。杜氏曰魯黨范氏故懼

晉比年四城啟陽今瑯琊開陽縣襄陵許氏曰所城近敵故帥師焉地震廟災變異弗圖而取田城邑兵役相繼可謂不畏天命矣中失而外鍵本亡而末務此魯之季世也

宋樂髡帥師伐曹

高氏曰曹本屬宋既而叛之襄陵許氏曰宋始窺曹曹不量力

而奸彊國不修德而圖大功則適足以取亡而已

秋

七月

丙子季孫斯卒

此意如之子季桓子也
廣子肥嗣是曰康子

蔡人放其大夫公孫獵于吳

杜氏曰公子駟之黨
高氏曰放大夫者國

也而稱人衆人逐之也其放之于吳召亂
之道也厥後蔡亂以公孫氏豈獵之黨歟

冬

十月

癸卯秦伯卒

惠公也子
倬公嗣

叔孫州仇仲孫何忌帥師圍邾

高氏曰邾子已受
盟于句繹今二卿

踰年而圍之是自敗其盟也雖邾政不修有以致
寇然魯之棄信亦已甚矣自是盟不足恃春秋弗

志也

經書月四書日四大衍歷正月丙寅小旦日冬至
二月乙未大三月乙丑小四月甲午大甲午旦日
五月甲子大辛卯二十八日六月甲午小七月癸
亥大丙子十四日八月癸巳小九月壬戌大十月
壬辰小癸卯十二日十一月辛酉大十二月辛卯小

四年

庚戌敬王二十九年。晉霸定二十一。蔡昭
二十八年。穀。曹陽十一。衛出二。鄭聲十。
陳閔十一。紀儋十五。宋景二十六。齊景五
十七。秦悼公元年。楚昭二十五。吳夫差五

春

王二月

庚戌盜殺蔡侯申

左傳曰蔡昭侯將如吳諸大夫恐其又遷也公孫翩逐而射之

入於家人而卒杜氏曰賤者故稱盜不言弑賤盜也孔氏曰公孫辰公孫姓公孫霍雖並是弑君之黨而非弑君之首首是公孫翩翩賤故稱盜盜賤不得有其君故不言弑其君宣十七年蔡侯申卒是文侯也世家文侯申生景侯固固生靈侯般般生隱太子今昭侯中隱太子之子是文侯玄孫與高祖同名周人以諱事神二申未知孰誤澄按昭公在位二十八年子朔嗣是為成公

蔡公孫辰出奔吳

左傳曰公孫翩以兩矢門之衆莫敢進文之錯執弓而先翩射

之中肘錯遂殺之故逐公孫辰而殺公孫姓公孫吁

癸秦惠公

宋人執小邾子

襄陵許氏曰天下無霸故宋人得以執小邾子伐鄭入曹而無所忌

夏

蔡殺其大夫公孫姓公孫霍

胡氏曰姓與霍皆翩之黨稱國以殺者二

公孫蓋嘗謀國不使其君至於見庸者也

晉人執戎蠻子赤歸于楚

左傳曰楚人既克夷虎乃謀北方左司馬販申

公壽餘葉公諸梁致蔡於負函致方城之外於繒闕襲梁及霍單浮餘圍蠻氏蠻氏潰蠻子赤奔晉陰地司馬起豐析與狄戎以臨上雒左師軍于莧和右師軍于倉野使謂陰地之命大夫士蔑曰晉楚有盟好惡同之若將不廢寡君之願也不然將通於少習以聽命士蔑請諸趙孟趙孟曰晉國未

寧安能惡於楚必速與之士蔑乃致九州之戎將
裂田以與蠻子而城之且將為之卜蠻子聽卜遂
執之與其五大夫以界楚師于三户司馬致邑立
宗焉以誘其遺民而盡俘以歸呂氏曰昭十六年
楚子誘戎蠻子殺之戎蠻近楚之地故晉人執其
君而歸于楚畏楚之彊也高氏曰諸侯有罪方伯
請命於天子問罪然後執而歸于京師正也不請
王命而執之歸于京師若晉人執衛侯歸于京師
罪尚可容若晉侯入曹執曹伯界宋人執諸侯界
諸侯其罪尤重今晉為中國盟主而執戎蠻子歸
于楚以君臣言則楚為君矣以彊弱言則楚為霸
矣胡氏曰云歸于楚者猶曰京師楚也晉主夏盟
為日久矣不競
至此春秋所惡

城西郭

杜氏曰
備晉也

六月

辛丑亳社災

亳公作蒲。孔氏曰殷有天下作都于亳。亳社殷社也。蓋武王伐紂使諸

侯各立其社以戒亡國。其社有屋故火得焚之。災天火也。

秋

八月

甲寅滕子結卒

頃公也在位二十三年子廋母嗣是為隱公

冬

十有二月

葬蔡昭公

高氏曰國亂故緩春秋於定哀之際錄昭公尤詳者哀其不幸也當齊桓晉文

之隆蔡猶不能自拔於楚凌遲至於標季而昭公乃銳然合中國以興召陵之會卒能以吳破楚入郢此其志力有過人者遭晉德之不競而不能遠撫使之卒陷于吳楚之禍君子是以哀昭公之不幸而為之數見於經也使昭公出於晉悼之世其功烈當何如哉

葬滕頃公

經書月四書日三大衍歷正月庚申大壬申冬至二月庚寅小庚戌二十一日三月己未大四月己丑小五月戊午大六月戊子小辛丑十四日七月丁巳大八月丁亥小甲寅二十八日九月丙辰大十月丙戌大十一月丙辰小十二月乙酉大

五年

辛亥敬王三十年。晉霸定二十二。蔡成侯朔元年。曹陽十二。衛出三。鄭聲十一。

陳閔十二。杞僖十六。宋景二十七。齊景五十八卒。秦悼二。楚昭二十六。吳夫差六

春

城毗

毗頻夷切。公作比。杜氏曰：備晉也。

夏

齊侯伐宋

高氏曰：伐宋者，以求宋也。晉侯失霸，宋人闕之，齊人爭之，是以伐而求之，得宋

則霸可圖矣。

晉趙鞅帥師伐衛

高氏曰：衛不受蒯聩，且受范中行氏故也。

秋

九月

癸酉齊侯杵臼卒

杵公作處。左傳曰齊燕姬生子不成而死諸子鬻如之子荼

嬰諸大夫恐其為太子也言於公曰君之齒長矣未有太子若之何公曰二三子間於憂虞則有疾疾亦姑謀樂何憂於無君公疾使國惠子高昭子立荼寘羣公子於萊公子嘉公子駒公子黔奔衛公子鉏公子陽生來奔澄按景公在位五十八年

冬

叔還如齊

高氏曰使卿吊且會葬也

閏月

葬齊景公

公羊傳曰閏不書此何以書喪以閏數也喪以閏數喪事畧也張氏曰景公五

十八年前有晏嬰後有孔子晏嬰告之以陳氏將竊其國孔子告以君君臣臣父父子子公亦知說而從之矣而卒不能用及大臣父父子子公亦知說反使之姑謀樂而勿憂無君卒致身死肉未寒子死國亂魯未十年陳恒弑簡公而移其社稷景公之卒葬書于春秋豈不為享國日久而曾無遠慮者之戒

經書月二書日一大衍歷正月乙卯小丁丑冬至二月甲申大三月甲寅小四月癸未大五月癸丑小六月壬午大七月壬子小八月辛巳大閏月辛亥小經九月癸酉今在閏月九月庚辰大十月庚

戊子十一月己卯大長
歷是年閏十月癸酉九月二十一日

六年

壬子敬王三十一年。晉霸定二十三。蔡成
二。曹陽十三。衛出四。鄭聲十二。陳閔

十三年。杞僖十七。宋景二十八。齊安孺子荼
元年。秦悼三。楚昭二十七卒。吳夫差七

春

城邾瑕

瑕音遐。公作葭。杜氏曰：任城亢父縣北
有邾婁城。高氏曰：瑕邾邑。魯未嘗取於邾。

而遽城之。見魯之迫邾也。是年冬伐邾。明年遂入
邾。邾益微弱。魯以不義疆城之也。聖人因其城而
繫之邾者。不與魯
之擅并人土地也。

晉趙鞅帥師伐鮮虞

左傳曰：治范氏之亂也。杜氏
曰：四年鮮虞納荀寅於柏人。

吳伐陳

高氏曰陳楚與也吳之入楚使召陳侯陳侯不來吳人怨之元年侵陳今復伐陳修

怨也陳自是與吳成

夏

齊國夏及高張來奔

左傳曰齊陳乞偽事高國者又謂諸大夫曰二子恃得君

而欲謀二三子盍及其未作也先諸大夫從之陳乞鮑牧及諸大夫以甲入于公宮昭子聞之與惠子乘如公戰于莊敗國人追之國夏奔莒遂及高張晏圍弦施來奔蘇氏曰陳乞將立陽生乃先逐國高襄陵許氏曰高國奔而後陳乞弑君之謀得肆

叔還會吳于柵

柵莊加切。襄陵許氏曰叔還吳在柵故往會之始結吳好也

魯政之不修務與吳親以資其力君子知魯之將有吳患矣

秋

七月

庚寅楚子軫卒

左傳曰楚子在城父將救陳卜戰不吉卜退不吉王曰然則死也再

敗楚師不如死棄盟逃誓亦不如死命公子啟五辭而王不可則命公子結亦不可則命公子啟五辭而後許將戰王有疾攻大冥卒于城父子聞退曰君王舍其子而讓羣臣敢忘君乎從君之命順也立君之子亦順也與子西子期謀潛師閉塗逆越女之子章立之而後還高氏曰昭王委政囊瓦寵費無極使賢人誅戮諸侯怨叛入郢之禍宮汙冢發幾不免其身迄得反國而卒於位者國有一申包

胥也

齊陽生入于齊

左傳曰陳僖子使召公子陽生夜至於齊僖子使子士之母養之與

饋者皆入立之使胡姬以安孺子如賴去鬻如殺王甲拘江說因王豹于句賁之丘高氏曰係陽生于齊者與小白同義不書自魯者魯無助也

齊陳乞弑其君荼

荼音舒公作舍○左傳曰公使朱毛告於陳子曰微子則不及

此然君異於器不可以二器二不匱君二多難敢布諸大夫僖子不對而泣曰君舉不信羣臣乎以齊國之困困又有憂少君不可以訪是以求長君庶亦能容羣臣乎不然夫孺子何罪毛復命公悔之毛曰君大訪於陳子而圖其小可也使毛遷孺子於貽不至殺諸野幕之下葬諸父冒淳杜氏曰

弑荼者朱毛陽生也而書陳乞以明乞立陽生而荼見弑則禍由乞始也高氏曰春秋書弑君之賊雖其人不自為必以禍所從發為主所以誅其意也

冬

仲孫何忌帥師伐邾

高氏曰魯人必欲滅邾而後已自公即位以來四書邾役

積明年入邾之亂

宋向巢帥師伐曹

高氏曰樂髡伐之猶未服且為入曹起也

經書月一書日一大衍歷正月己卯小壬午冬至二月戊申大三月戊寅小四月丁未大五月丁丑小六月丙午大七月丙子小庚寅十五日八月乙巳大九月乙亥小十月甲辰大十一月甲戌小十

二月癸卯大

七年

癸丑敬王三十二年。晉霸定二十四。蔡成三。曹陽十四。衛出五。鄭聲十三。陳閔

十四。杞僖十八。宋景二十九。齊悼公陽生元年。秦悼四。楚惠王章元年。吳夫差八

春

宋皇瑗帥師侵鄭

左傳曰鄭叛晉故也高氏曰晉衰齊亂故宋公闕霸也不務德

而加兵於人非霸主之義故書侵張氏曰宋鄭始因隙地以起兵爭卒致各取其師以逞其殺人之志所以詳其交爭之實也襄陵許氏曰定十五年老丘之役鄭宋始構怨至是復侵九年取鄭師于雍丘十三年取宋師于岳

晉魏曼多帥師侵衛

左傳曰衛不服也杜氏曰五年晉伐衛至今未服高氏曰

衛侯棄其父至今六年矣猶未納也晉不以此致討而以范中行氏加兵于衛故書侵

夏

公會吳于鄫

左傳曰吳來徵百牢子服景伯對曰先王未之有也吳人弗聽乃與之反

自鄫以吳為無能為也張氏曰比年書會吳所以著哀公之失謀於始而遺患於後日也高氏曰吳欲霸諸侯故魯先往會之杜氏曰鄫今瑯琊鄫縣

秋

公伐邾

八月

己酉入邾以邾子益來

左傳曰季康子欲伐邾乃饗大夫以謀之子服景伯

曰小所以事大信也大所以保小仁也背大國不信伐小國不仁孟孫曰二三子以為何如對曰禹合諸侯於塗山執玉帛者萬國今其存者無數十焉唯大不字小小不事大也伐邾及范門茅成子請告於吳不許曰魯擊柝聞於邾吳二千里不三月不至何及於我師遂入邾處於邾吳公宮衆師盡掠邾衆保于繹師宵掠以邾子益來獻于亳社囚諸負瑕邾茅夷鴻以束帛乘韋自請救于吳曰魯弱晉而遠吳以陵我小國若夏盟于鄆衍秋而背之四方諸侯其何以事君且魯賦八百乘君之貳也邾賦六百乘君之私也以私奉貳唯君圖之蘇氏曰魯入邾以邾子益來而不書滅何也邾大夫茅

夷鴻保於茅請救於吳明年吳為之伐魯魯復邾
子故不言滅也在外曰以歸在內曰以來內外之
也別

宋人圍曹

高氏曰宋之伐曹數矣
今又圍之亦已甚矣

冬

鄭駟弘帥師救曹

左傳曰鄭桓子思曰宋人有曹
鄭之患也不可以不救高氏曰

鄭與曹疎矣所以救曹者非
志於義也欲報皇瑗之師也

經書月一書曰一大衍歷正月癸酉小丁亥冬至
二月壬寅大三月壬申小四月辛丑大五月辛未
大六月辛丑小七月庚午大八月庚子小己酉十
日九月己巳大十月己亥小十一月戊辰大十二

月戊戌小長歷
是年閏十二月

八年

甲寅敬王三十三年。晉霸定二十五。蔡成
四。曹陽十五。國亡。衛出六。鄭聲十四。

陳閔十五。杞僖十九卒。宋景三十。
齊悼二。秦悼五。楚惠二。吳夫差九。

春

王正月

宋公入曹以曹伯陽歸

左傳曰曹伯陽即位好田
弋曹鄙人公孫彊好弋獲

白鴈獻之且言田弋之說說之因訪政事有寵使
為司城以聽政彊言霸說於曹伯從之乃背晉而
奸宋宋人伐之晉人不救築五邑於其郊曰黍丘
揖丘大城鐘邠宋公伐曹將還褚師子肥殿曹人

詬之不行師待之公聞之怒命反之遂滅曹執曹伯及司城彊以歸殺之蘇氏曰此滅曹也其不書

滅言自滅也猶虞之滅言晉人執虞公而不言滅也

吳伐我

左傳曰吳為邾故伐我武城克之吳師克東陽而進舍於五梧明日舍於蠡室明日

舍於庚宗遂次於泗上吳人行成盟而還蘇氏曰不言四鄙而直言伐我兵加于國都也

夏

齊人取讎及闕

闕公作倅○程子曰內失邑不書已與之彼以非義而受則書取此

與濟西田是也魯入邾而以其君來致齊怒吳伐故賂齊以說之

歸邾子益于邾

左傳曰齊侯使如吳請師將以伐我乃歸邾子高氏曰邾嘗屬齊而

益又齊之甥也齊如吳請師吳亦受邾之
愬公懼吳師復來乃歸邾子以紓國難

秋

七月

冬

十有二月

癸亥杞伯過卒

過古未切。僖公也在位十九年其子維嗣是為湣公

齊人歸讜及闡

孫氏曰公既歸邾子益故齊人歸讜及闡杜氏曰不言來命歸之無

官使也

經書月三書日一大衍歷正月丁卯大癸巳冬至
二月丁酉小三月丙寅大四月丙申小五月乙丑
大閏月乙未小六月甲子大七月甲午小八月癸
亥大九月癸巳大十月癸亥小十一月壬辰大十
二月壬戌小
癸亥三日

九年

乙卯敬王三十四年。晉霸定二十六。蔡成
五。衛出七。鄭聲十五。陳閔十六。杞閔
公雖元年。宋景三十一。齊悼三
秦悼六。楚惠三。吳夫差十

春

王二月

葬杞僖公

杜氏曰三月而葬速

宋皇瑗帥師取鄭師于雍丘

雍於勇切。左傳曰：鄭圍宋雍丘，宋皇瑗

圍鄭師，每日遷舍，壘合鄭師哭。子姚救之大敗宋取鄭師，使有能者無死以却。張與鄭羅歸孔氏曰：覆而敗之，曰取，謂若羅網之所掩覆一軍皆見禽也。杜氏曰：雍丘屬陳留。張氏曰：今屬開封。襄陵許氏曰：春秋之季，日尋干戈，鄭以不義深入敵境而圖其邑，此固喪師之道也。

夏

楚人伐陳

左傳曰：陳即吳故也。

秋

宋公伐鄭

杜氏曰：報雍丘。

冬

十月

經書月二書日無大衍歷正月辛卯大戌戌冬至
二月辛酉小三月庚寅大四月庚申小五月己丑
大六月己未小七月戊子大八月戊午小九月丁
亥大十月丁巳小十一月丙戌大十二月丙辰大
十年丙辰敬王三十五年。晉霸定二十七。蔡成
六。衛出八。鄭聲十六。陳閔十七。杞閔
二。宋景三十二。齊悼四卒。
秦悼七。楚惠四。吳夫差十一。

春

王二月

邾子益來奔

左傳曰邾子益無道吳子討而囚之使邾大夫奉太子革以為政邾子來

奔齊甥也故遂奔齊高氏曰先為魯所獲而又來奔其不知恥甚矣

公會吳伐齊

左傳曰齊侯使辭師于吳吳人曰昔歲寡人聞命今又革之不知所從將

進受命于君吳子使來微師伐齊公會吳子邾子邾子伐齊南鄙師于鄆

三月

戊戌齊侯陽生卒

左傳曰齊人弒悼公赴于師吳子三日哭于軍門之外襄陵許

氏曰人事之變有幸不幸而春秋之義裁成天地見正命焉澄曰當時以吳師在齊而公卒遂以為弒爾悼公在位四年子壬嗣是為簡公

夏

宋人伐鄭

襄陵許氏曰春秋取其師秋又伐之明年夏又伐之惡其修怨不已也

晉趙鞅帥師侵齊

左傳曰取犂及轅毀高唐之郭侵及賴而還襄陵許氏曰助吳

亂華伐齊之喪具文以見其罪澄曰吳猶遭齊喪而去之晉乃乘齊喪而伐之魯吳之不若也高氏曰齊率諸侯以貳晉可討矣然趙鞅加兵於有喪之國聖人弗與也故書侵異乎士句矣

五月

公至自伐齊

師氏曰公會吳師以伐疆齊吳人之心不可信而疆齊之禍不可測其危

可知矣高氏曰齊魯接壤而公會吳師伐之既聞其喪則遂班師可也所以久而不歸者公之進退

制在吳
故也

葬齊悼公

高氏曰不及五月而葬簡也

衛公孟彊自齊歸于衛

高氏曰公孟彊以蒯賸之黨見逐晉納蒯賸齊助出

公而反納彊則知逐非其罪矣始彊奔鄭自鄭奔齊至是遂假齊之力以歸焉

薛伯夷卒

夷公作寅。薛惠公也在位十二年

秋

葬薛惠公

冬

楚公子結帥師伐陳

陳即吳不服楚故再伐之

吳救陳

左傳曰吳延州來季子救陳謂子期曰二君不務德而力爭諸侯民何罪焉我請退

以為子名務德而安民乃還胡氏曰春秋惡首惡善解紛自誅亂臣討賊子之外凡書救者未有不善之也救在王室則罪諸侯子突救衛是也救在遠國則罪四鄰晉陽處父救江是也救在荒裔則罪中國楚公子貞帥師救鄭狄救齊吳救陳是也陳者有虞之後嘗為楚滅而僅存爾今又無故興師侵伐而列國諸侯縱其暴橫不能修方伯連率之職而吳能救之深著楚罪而傷中國之衰也

經書月三書日一大衍歷正月丙戌小癸卯冬至二月乙卯大三月乙酉小戊戌十四日四月甲寅大五月甲申小六月癸丑大七月癸未小八月壬子大九月壬午小十月辛亥大十一月辛巳小十

二月庚戌大長
歷是年閏五月

十有一年

丁巳敬王三十六年。晉霸定二十八。
蔡成七。衛出九。鄭聲十七。陳閔十。

八。杞閔三。宋景十三。齊簡公壬
元年。秦悼八。楚惠五。吳夫差十二。

春

齊國書帥師伐我

左傳曰齊為鄆故國書高無不
帥師伐我及清季孫謂其宰冉

求曰齊師在清必魯故也若之何求曰一子守二
子從公禦諸竟季孫曰不能求曰居封疆之間季
孫告二子二子不可求曰若不可則君無出一子
帥師背城而戰季孫使從於朝侯於黨氏之溝武
叔呼而問戰焉對曰君子有遠慮小人何知懿子
疆問之對曰小人慮材而言量力而共者也武叔

曰是謂我不成丈夫也退而蒐乘孟孺子洩帥右師顏羽御郕洩為右冉求帥左師管周父御樊遲為右老幼守宮次于雩門之外五日右師從之師及齊師戰于郊師入齊軍右師奔齊人從之陳瓘陳莊涉泗孟之側後入以為殿抽矢策其馬曰馬不進也林不狃徐步而死師獲甲首八十齊人不能師宵謀曰齊人遁冉有請從之三季孫弗許公為與其嬖僮汪錡乘皆死冉有用矛於齊師故能入其軍澨按郊之戰孟孺子所帥之右師敗幸而冉求所帥之左師不敗爾故能用矛入齊軍能獲其甲首八十能使齊人不能師皆冉師之勝也傳於冉求之師稱師於孟孺子之師稱右師使冉師亦如孟師魯其殆哉

夏

陳轅頗出奔鄭

轅公作袁頗破可切又平聲○左傳曰初轅頗為司徒賦封田以嫁

公女有餘以為已大器國人逐之故出道渴其族轅咥進稻醴梁馮腍脯焉喜曰何其給也對曰器

成而具曰何不吾

諫對曰懼先行

五月

公會吳伐齊

左傳曰為郊戰故會吳子伐齊克悼至于贏澄曰因齊國之見伐乃再會

吳伐齊欲以報也

甲戌齊國書帥師及吳戰于艾陵齊師敗績獲齊

國書

左傳曰中軍從王胥門巢將上軍王子姑曹將下軍展如將右軍齊國書將中軍高無平

將上軍宗樓將下軍桑掩胥御國子戰于父陵展如敗高子國子敗胥門巢王卒助之大敗齊師獲國書公孫夏間丘明陳書東郭書革車八百乘甲首三千以獻于公公使太史固歸國子之元高氏曰書獲國書與宋華元同然華元生獲而國書死獲劉氏曰吳之無道犯間上國涉數千里之地以伐人之邦國書用齊內不能安其君外不能交鄰國而輕與之戰其不愛百姓也不亦甚乎

秋

七月

辛酉滕子虞母卒

隱公也在位六年

冬

十有一月

葬滕隱公

衛世叔齊出奔宋

世穀作大○左傳曰初疾娶于宋子朝其娣嬖子朝出孔文子

使疾出其妻而妻之疾使侍人誘其初妻之娣寘於犂而為之一宮如二妻文子怒欲攻之仲尼止之遂奪其妻或淫于外州外州人奔之軒以獻恥是二者故出高氏曰春秋書內外大夫出奔者凡五十有八蓋君之股肱故重而書之然春秋之末何其出奔之多也是時政在大夫各欲自專始則相猜相忌終乃相攻相逐也

經書月三書日二大衍歷正月庚辰小戊申冬至閏月己酉大二月己卯小三月戊申大四月戊寅

大五月戊申小甲戌二十七日六月丁丑大七月
丁未小辛酉十六日八月丙子大九月丙午小十
月乙亥大十一月乙
己小十二月甲戌大

十有二年

戊午敬王三十七年。晉霸定二十九。
蔡成八。衛出十。鄭聲十八。陳閔十。

九。杞閔四。宋景三十四。齊簡二。
秦悼九。楚惠六。吳夫差十三。

春

用田賦

左傳曰季孫欲以田賦使冉有訪諸仲尼
仲尼不對而私於冉有曰君子之行也度

於禮施取其厚事舉其中斂從其薄如是則以丘
亦足矣若不度於禮而貪冒無厭則雖以田賦將
又不足且子季孫若欲行而法則周公之典在若
欲苟而行又何訪焉何氏曰軍賦十井不過一乘

哀公外慕疆吳空盡國儲故復用田賦田謂一井之田賦者斂取其財物也襄陵許氏曰以丘賦為不足於是更用田賦籍田而取之不待及丘也張氏曰田賦之實不書其詳於傳獨孔子言以丘足矣可見加賦於古合何氏許氏之說觀之可以得春秋之旨澄曰按賦法脩於一成成方十里有田百井內六十四井為一甸計五百七十六夫為一旅之衆當出兵車五乘步卒三百六十人甲士十五人戎馬二十四重車五乘將重車者百二十五人牛六十頭外有三十六井為二丘四井無征作丘甲者一甸之外所餘二丘亦計其夫數為二百八十八夫又出兵車二乘步卒百四十四人甲士六人戎馬八匹重車二乘將重車者五十人牛二十四頭先王之法一成百井惟一甸出賦其二丘不成甸者無賦及作丘甲則丘不成甸者亦賦矣作丘甲之後一成惟餘四井不成丘者無賦今用

田賦則井不成丘者亦賦矣家語謂季康子欲以一井田出法賦焉何氏謂田者一井之田許氏謂籍井而取之不待及丘是也四井三十
六夫雖不出車甲亦斂取其財物也

夏

五月

甲辰孟子卒

左傳曰昭夫人孟子卒昭公娶於吳故不書姓啖氏曰同姓不可書曰夫

人姬氏薨而曰孟子卒劉氏曰孟子者昭公之夫人吳女也其稱孟子諱娶同姓也高氏曰始昭公欲結好疆吳以去三家因娶于吳以吳同姓而謂之吳孟子國人不以為非而昭公乃知避其名春秋亦因其實而書之曰孟子卒澄曰固是以同姓而不可書之亦以見魯臣不以夫人之禮喪之也

昭公君也尚且逐出之而不得入葬于外而
葬不脩禮況其夫人乎一書卒而二義具焉

公會吳于橐臯

橐章夜切又音橐○左傳曰吳子使太宰嚭請尋盟公不欲使子貢

對曰盟所以因信也故心以制之玉帛以奉之言以結之明神以要之寡君以為苟有盟焉弗可改也已若猶可改日盟何益今吾子曰必尋盟若可尋也亦可寒也乃不尋盟杜氏曰橐臯在淮南逡道縣東南張氏曰地譜云逡道在今廬州慎縣東南

秋

公會衛侯宋皇瑗于鄆

鄆公作運○左傳曰吳徵會于衛衛侯會吳于鄆公

及衛侯宋皇瑗盟而卒辭吳盟吳人藩衛侯之舍子貢見太宰嚭語及衛故太宰嚭曰寡君願事衛

君衛君之來也緩寡君懼故將止之子貢曰衛君之來必謀於其衆其衆或欲或否是以緩來其欲來者子之黨也其不欲來者子之讐也若執衛君是墮黨而崇讐也夫墮子者得其志矣且合諸侯而執衛君誰敢不懼墮黨崇讐而懼諸侯或者難以霸乎太宰嚭說乃舍衛侯杜氏曰鄆發陽也廣陵海陵縣東南有發繇亭張氏曰地譜吳地海陵今秦州城下

宋向巢帥師伐鄭

左傳曰宋鄭之間有隙地焉曰彌作頃丘玉暢岳戈錫子產與

宋人為成曰勿有是及宋平元之族自蕭奔鄭鄭人為之城岳戈錫宋向巢伐鄭取錫殺元公之孫遂圍岳鄭罕達救岳圍宋師

冬

十有二月

蠡

左傳曰仲尼曰火伏而後蟄者畢今火猶西流

司歷過也杜氏曰周十二月今十月是歲應置閏而失不置雖書十二月實今之九月

司歷誤一月九月之初尚溫故得有蠡

經書月二書日一大衍歷正月甲辰小癸丑冬至

二月癸酉大三月癸卯小四月壬申大五月壬寅

小甲辰三日六月辛未大七月辛丑小八月庚午

大九月庚子大十月庚午小十一月己亥大十二

月己巳小

十有三年

己未敬王三十八年。晉霸定三十。蔡成九。衛出十一。鄭聲十九。陳閔二

十。杞閔五。宋景三十五。齊簡三。秦悼十。楚惠七。吳夫差十四

春

鄭罕達師師取宋師于岳

左傳曰宋向魋救其師鄭子賡使狗曰得桓魋

者有賞魋也逃歸遂取宋師于岳獲成謹郤延以六邑為壻孫氏曰報雍丘之師也二國覆師以相

償報其惡如此

夏

許男成卒

成公作成○元公也國滅後楚立之去比二十二年子嗣

公會晉侯及吳子于黃池

公羊傳曰吳稱子吳主會也其言及吳子會兩

霸之辭也左傳曰吳晉爭先吳人曰於周室我為長晉人曰於姬姓我為伯司馬寅曰夷德輕不忍

久請少待之乃先晉人外傳吳語曰吳王昏秣馬食士夜中命服兵擐甲陳士卒百人以為徹行萬人以為方陳王中陳而立左右軍亦如之為帶甲三萬以勢攻昧明王乃秉桴親鼓三軍皆譁鉦以振旅晉師大駭今董褐請事吳王曰天子有命周室卑約貢獻莫入今非王室不平安是憂億負晉衆庶不式諸戎狄楚秦將不長弟以力征一二兄弟之國孤欲守先君之班爵進則不敢退則不可孤之事君不得事君在今日董褐還致命乃告趙鞅曰臣觀吳王之色類有大憂將毒不可與戰主其許之先然不可徒許也趙鞅許諾令褐復命曰君掩王東海以淫名聞于天子則何有於周室夫命圭有命固曰吳伯不曰吳王諸侯是以敢辭夫諸侯無二君周室無二王君若無卑天子以干其不祥而曰吳公孤敢不順君命長弟許諾吳王乃退就幕而會吳公先軟晉侯亞之襄陵許氏曰左

氏曰先晉國語曰先吳此二國史籍之異也顧自宋之盟晉已為楚所先陵遲至於黃池之時豈能復與吳爭國語信也胡氏曰吳主會其先晉紀常也春秋四夷雖大皆曰子吳僭王矣其稱子正名也先吳則拂經而失序列書則限實而傳疑以會兩伯之辭而特書曰及順天地之經著盟會之實也杜氏曰陳留封丘縣南有黃亭近濟水張氏曰地譜東京開封縣有黃池

楚公子申帥師伐陳

高氏曰楚畏吳之彊無如之何故乘吳之出會而伐陳也

於越入吳

左傳曰越子伐吳為二隧疇無餘謳陽自南方先入郊其太子友王子地王孫

彌庸壽於姚自泓上觀之彌庸見姑蔑之旗曰吾父之旗也不可以見讐而弗殺也太子曰戰而不克將亡國請待之彌庸不可屬徒五千王子地助之戰彌庸獲疇無餘地獲謳陽越子至王子地守

復戰大敗吳師獲太子友王孫彌庸壽於姚入吳
孫氏曰吳子方會乘其無備也胡氏曰吳自柏舉
以來憑陵諸夏可謂彊矣春秋初書越入吳在柏
舉之後再書越入吳在黃池之後皆因事屬辭垂
戒後世也吳既勝齊復與晉人爭長自謂莫之敵
也而越已入其國都矣卽子曰夫以力勝人者人
亦以力勝之吳嘗破越遂有輕楚之心及其破楚
又有驕齊之志貪婪攻取不顧德義侵侮齊晉遂
為越所滅越又不監之復為楚所滅楚又不
監之復為秦所滅秦又不監之復為漢所滅

秋

公至自會

晉魏曼多帥師侵衛

魏下公脫曼字○襄陵許氏曰晉以范中行之難伐衛伐

鮮虞間齊之難而一侵之又再侵衛而諸侯卒莫之宗師雖數出能侵而已高氏曰蒯瞶在戚十有二年矣晉人不能以此討衛乃以范中行故而數興師故書侵

葬許元公

九月

螽

高氏曰周之九月夏之七月也其為農災又非冬十有二月之比也

冬

十有一月

有星孛于東方

公羊傳曰孛于東方見于旦也孫氏曰光芒四出曰孛按文十四年

有星孛入于北斗襄十三年有星孛入于北斗昭十七年有星孛入于大辰此不言所在之處者見于旦可知也

盜殺陳夏區夫

區烏侯切公作弔。高氏曰夏區夫者徵舒之後也徵舒弑君楚子

殺之而陳人猶使世執國政故春秋因其為盜所殺而書之與華孫同意凡書盜者以人皆可得而執之也盜殺蔡侯中盜殺陳夏區夫當春秋之季世變之甚至於盜興而專殺國君卿大夫則亂已極矣

十有二月

螽

呂氏曰今年九月螽十二月又螽又比年十二月螽陰陽錯亂甚矣襄陵許氏曰春秋書魯人

事至用田賦書魯天災至於二年三蠲見其民力已窮天命已去君子之心於魯已矣

經書月三書日無大衍歷正月戊戌大己未冬至二月戊辰小三月丁酉大四月丁卯小五月丙申大六月丙寅小七月乙未大八月乙丑小九月甲午大閏月甲子小十月癸巳大十一月癸亥大十二月癸巳小

十有四年

庚申敬王三十九年。晉霸定三十一。○蔡成十。○衛出十二。○鄭聲二十。○陳閔二十。○杞閔六。○宋景三十六。○齊簡四。○秦悼十一。○楚惠八。○吳夫差十五。

春

西狩獲麟

左傳曰西狩於大野叔孫氏之車子鉏商獲麟以為不祥以賜虞人仲尼觀之

曰麟也。然後取之。杜氏曰：麟王者之嘉瑞也。今出非其時而失其歸，此聖人所以為感也。絕筆於獲麟之一句者，所感而作固所以為終也。大野在魯西，故言西。冬獵曰狩，蓋虞人修常職。呂氏曰：麟出非其時，知聖人之卒不遇也。麟不出春秋，其不作乎聖人之一動一言，未有無因而作者，當其可也。故河圖出而畫卦，洛書出而叙時，獲麟而作春秋，其揆一也。如是，程子曰：世衰道微，聖人救正之意，舊矣。但因麟而絕筆耳。麟不作，亦必作也。

大衍歷正月壬戌，大甲子，冬至二月壬辰。小三月辛酉，大四月辛卯，小五月庚申，大朔日食。閏四度六月庚寅，小七月己未，大八月己丑，小九月戊午，大十月戊子，小十一月丁巳，大十二月丁亥，小長曆是年閏二月。

春秋纂言卷十二